


بہاء حجازی

خلائق کے اکر سین الہی قدام



سابقہ
نمبر



لتحويلك إلى الجروب أضغط هنا



لتحويلك إلى الموقع أضغط هنا

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

خلاص الكرسيين اللي قدام

(للمكتبيين)



بهاء حجازي

بِسْمِ اللَّهِ الرَّحْمَنِ الرَّحِيمِ
لِلثَّقَاتِ وَالْعُلَمَاءِ

Handwritten text in Arabic script, likely a title or header.

Handwritten text in Arabic script, possibly a subtitle or a line of poetry.

Handwritten text in Arabic script, possibly a line of poetry or a note.

Large handwritten number '137' in red ink, enclosed in a faint circular outline.

Handwritten text in Arabic script, possibly a signature or a date.

Handwritten text in Arabic script, possibly a signature or a date.

إهداء

إلى مَنْ يعاني في طريقه، يوجد طرقٌ بديلة، لكنك لا تنتبه.

طالما أنّ الله يُوقظك في كلّ صباح؛
فلا تستسلم، فلديك فرصة.

« ستيف هارفي

أشهر مذيع في العالم

1830

Handwritten text, possibly a date or reference number.

Handwritten text, possibly a signature or name.

Handwritten text, possibly a date or reference number.

لا تفعل مثلي

المفروض كنت أقولك إن دي المقدمة، بس كاتب هذه السطور لا يقرأ المقدمات، وخفت أن تقلدني، فسامحني في العنوان دا.

هذا الكتاب تجربة شخصية جدًا، عانيت قبلك - أو معك - من الاكتئاب لشهور، اكتئاب حاد تحول لأعراض جسدية، طلب مني الدكتور أن أضحك، حاولت بكل الطرق، كل الأفلام الكوميديية لم تجد نفعًا، كل الكتب الكوميديية (الساخرة) الموجودة في السوق تفتقد هذه الميزة.

لماذا لا يوجد لدينا كتب تقرأها فتضحك، دون أن يكون خلفها أي هدف سوى الضحك، كتب غير عميقة، ولا تحتوي على حلّ للقضايا الكبيرة، لا يوجد بها حلّ للملفّ النووي الإيراني، الصّلع بين الكوريتين، عودة كريم بنزيما لهجوم المنتخب الفرنسي، ولا مصير الشرق الأوسط الجديد بعد هلاك الخنافس في نفق العروبة، ولا حلّ لأزمة شهداء فيلم الممر، أو أزمة دفاع نادي الزمالك.

كتاب بسيط لمجموعة مواقف تحدث معك يوميًا، مع حكايات
للمتعافين من الاكتئاب.

في هذا الكتاب، سأضمن لك شيئًا وحيدًا؛ أن تضحك، ما عدا
ذلك معرفتكش.

« حفظ الله الوطن، وجريدة الوطن.

[Faint handwritten text in Arabic script, likely bleed-through from the reverse side of the page.]

إهداء خاص جدًا

إلى أبي، أصدق الرجال في حياتي.
إلى أمي، أفضل النساء في نظري.
وامرأة تعرف نفسها، أقنعتني أن الإنسان بإمكانه فعل
كل شيء إذا أراد، وحاول،.. وبعدها اختفت.

... ..
... ..
... ..

... ..
... ..

... ..
... ..
... ..
... ..

... ..
... ..
... ..
... ..

... ..
... ..
... ..
... ..

... ..
... ..

الحكاية (١)

أمّ ندا

ليّا ٨ أخوات أنا تاسعهم، كلّ واحد فينا شخصية مختلفة،
وشكل مختلف، وحياة مختلفة، المهمّ هنا شريف، وشريف دا هوّ
الحدوتة والقصة، هوّ بيشتغل في شركة مقاولات، وفي يوم عمل
حادثة وقع على دماغه، حصل له فقدان في الذاكرة وارتجاج في المخ،
هوّ فاكر كلّ حاجة ما قبل الحادثة، لكنّ مش قادر يكون أيّ ذاكرة
عن اللي حصل بعد الحادثة، يعني إيه؟ يعني هوّ عارف إنّ له أخ
اسمه بهاء، بسّ مش عارف مين فينا بهاء.

فكان مرّة يناديني بهاء، مرّة يقولي يا خالتي، وفي مرّة قاللي يا مدام
شيريهان، طبعاّ إحنا مُنهارين عليه، بسّ مش قادرين منضحكش
على حالة النسيان دي، الحالة كانت صعبة، الدكاترة قالوا ارتجاج في
المخ، المستشفيات الخاصة صمّموا إنه لازم يتحجز بسّ تسبب ٢٠
ألف تحت الحساب، واليوم بخمسة، وآهو لو مطلعش فيه حاجة
همّا منحسروش حاجة، من باب إوعى تقول للفلوس لآ!!

المستشفيات الحكومية صمّموا إن مفيهوش حاجة، وإنه ممكن
يقدم في كشف كلية الشرطة لأنه لائق قوي، ولازم يخرج فوراً من
باب «هيّ المشرحة ناقصة قُتلة!».

وفي يوم مروح البيت من مسجد مصطفى محمود، وعدّيت
السلم، وركبت العربية من أول شارع ناهيا، راكب طول
الطريق مسهّم، وعيني مرغرة، ركبت جنبي من نصّ الطريق
واحدة ستّ، في سنّ والدي (50 - 55 سنة) لاحظت إني
محرّكتش عيني عن هدف ثابت؛ ألا وهو قرعة الرّاجل اللي
قدّامي.

حاولت أن تفضّ بكارة فمي (يخرّب بيت حلاوة دا تعبير)،
قالت لي:

- إنت لو ضحكت هجوّزك ندا بنتي!

من غير ما أحسّ لقيتني بضحك، معتقدش إنها خطّطت
تضحكني، هيّ طلعت منها بعفوية، عشان كدا أنا ضحكت (أنا
شخص صعب أضحك)، بسّ اللي بيطلع من القلب ميلاقيش
مكان تالي غير القلب يوصله.

أنا برهه مكنّتش قادر اتكلّم، هيّ راحت خبّطالي الجملة

التالية:

إنت عارف ندا دي بنتي الأخيرة.. مريياها ع الغالي.. والله ما
بفطرها غير محشي.

حين شعرت أنني لم أستسغ أن تفر ندا «محشي»؛ حاولت أن
تخفف من وطأة الجملة:

- محشي ورق عنب.

أخيراً بعد صمت قلت لها:

- ربنا يخليها لك.

وكأنني أعطيت لها الأذن لتنتلق:

- ويخليك، ويفرح قلبك، ويردك لشبابك.. والله اللي شايل
همه ما هيجي أحسن منه.. وعلى فكرة أنا مجهزة ندا أحسن
جهاز.. إنت عارف أنا جايبهاها ٣ تكييفات؛ يعني هوا هيجيلك
من كل حته.

ضحكتُ هذه المرة بصوتٍ خفيضٍ لكنه مسموع، وقالت بنبرة
الواثق من نفسه:

- كنت عارفه إنك هتحب التكييفات.

بساطة هذه المرأة التي لا أعرف اسمها، أخرجتني من
بؤسي، هي طبعاً لا تريد أن تزوجني ابنتها، وقد لا يكون لديها

بنات من الأساس، لكن فخرها وهي تنطق كلمة تكييفات يجعلني متأكد إن لديها ثلاث تكييفات.. كانت تنطقها هكذا «تكييفاتش».

﴿ - بص، إنت تركب تكييف في أوضة النوم، وتكييف في الصالة، وتكييف في أوضة الأطفال.. تقعد تتفرج ع الكورة في الصالة تتكيف.. حابب تروح لندا الأوضة تتكيف برضه (لسبب لا أعلمه فهمت إنها لا تقصد التكييف).. معجبكش وزهقت من وش ندا؛ تروح أوضة الأطفال تتكيف برضه.

كان لسانُ حالها يقول «أينما كنتَ سيدركك الهواء».

قلت لها:

- مش هينفع.

امتعضت:

- عاوز تكييف رابع أنا عارفه.

ضحكتُ هذه المرة حتى خرجت حشرات من أنفي:

- لا مش عاوز تكييف رابع، ومش عندي مُشكلة في ندا..

أنا عندي مُشكلة في الكهربي بتاعة التلات تكييفات اللي لو شغلتهم هضطر أشغل ندا في المشي البطال عشان ادفع كهربتهم.

ضحكتُ هي هذه المرّة، فأنت المحطّة التي ستنزّل فيها، كان لديّ فضول لأعرف اسمَها؛ من شبّاك الميكروباص ناديتُ عليها:

- أنتِ اسمك إيه؟

ضحكتُ ضحكةً الذي توقع السؤال:

- خالتك أمّ ندا محشي.

العزيزة ندا أينما كنتِ، يجبُ أن تفخري بأَمك، هذه السيدة الفاضلة، التي استطاعت في ظلّ هذه الظروف الصّعبة التي تُبكي الرّجال أن تشتري لابنتها ثلاثة تكييفاتش.

نصيحة 1

إذا كنت تعاني من الاكتئاب وتشعرُ بميولٍ للعزلة؛ لا تفعل،
اختر شخصًا قريبًا، واحك له، علميًا الشيء الذي تعاني منه تقلَّ
حدّته عند البوح به.

إذا لم تجد شخصًا تحكي له، اكتب ما يُضايقك في ورقة، الكتابةُ
من التمارين التي يستخدمها أساتذة الطبّ النفسي في الخروج من
الاكتئاب.

الحكاية (٢)

الكرسيين اللّي قدام

أنا ساكن في شارع ناھيا، وشارع ناھيا.. بعيداً عن التدني في كل شيء فيه؛ إلا إنه يضمّ أسوأ سواقين مُمكن تشوفهم في حياتك، ٩٩,٩٪ منهم مبيصوموش في رمضان، ومش بسّ كدا؛ في عزّ الضهر الساعة ٢، والناس مش قادرة تبّلع ريقها من الحرّ، تلاقي الواحد منهم ماسك قزاة الحاجة السّاقعة الصّاروخ مشبّرة، تخلي أثنّ ريق يجري عليها (تحسّه اختبار لصبرك).

المهمّ أنا مش عارف كنت رايح فين، وركبت مع سواق منهم، ومن سوء حظّي (هتكتشف سوء حظّي طول الكتاب)، السواق قال لي:

- تعالى قدام يا برنس.

لا أدري ما الذي رآه في من برنسة حتى يناديني بهذا.. ركب العربيّة وفضل يدور في انتظار شخص تاني يركب جنبي، فأنا قلت له خلاص الكرسيين اللّي قدام يا أسطى.

الرجل احترمني جدًا، وبقي يعاملني معاملة الأسباني لانستا لما جاب جون نهائي كاس العالم في هولندا، فتح الحاجة الساقعة بسنانه، وداس بسنانه على الغطاء طبّقه، وراح راميه في الشارع، وراح فاتح باكو بلح بالعجوة، ريحة العجوة فيه كانت تجنّ الحقيقة، أو يمكن عشان أنا كنت صايم، المهم يا سيدي.. أنا معلقتش على الموضوع لأنّ هوّ في الأوّل والآخر حُر.

- ما حدّ يلملنا الأجرة ورايا حضرات.

قالها ناظرًا في المرآة التي وضعها في المنتصف، وعلق عليها صورة شعبان عبد الرحيم، بصلي وقال لي:

- طبعًا انت بتقول إيه السواق الكافر دا، اللي بيشرّب حاجة ساقعة في عزّ نهار رمضان دا!!

حاولت أن أشرح له أنّ الصيام والعبادات أشياء بين العبد وربّه، وليس من حقّي أن أحاسبه عليهم، لكنه بترّ الكلام قبل أن أقوله:

- بصّ يا سيدي، أنا هقولك؛ عشان سبب واحد بسّ.

اعتقدت أنه احترمني لأنّي أخذت الكرسيين اللي قدام بمفردي:

- عشان يعني خدت الكرسيين اللي قدام؟

قلّتها بمتتهي الغرور الذي وُجد في شارع ناهيا منذ أن أسّسه
المأسوف عليه، فقال بجملة نسفت غروري:

- كرسيين إيه.. وخر إيه يا أستاذ، طيب علي الطلاق من أمّ احمد
ما انا واخذ منك أجرة. يا عمّ أنا هقولك عشان انت مسألتنيش..
أنا اللي بيسألني بقوله وانت مال أمك! لكن انت مسألتش فعشان
كدا هقولك.

أعجبتني منطقته، هو كعاهرة تعطي جسدها لمن يتعقف عنها،
وتمنعه عمّن يطلبه، فالبعض يشعر في متعة حين يتم تجاهله،
هناك نوع من السيدات تحب الرجل الذي لا يعطيها اهتمامًا،
تشعر بسعادة حين يتم تجاهلها، على كل أعجبتني منطقته،
فخلعت النظارة لأرى ملامحه أكثر.

كان يضع كمية جلّ على رأسه تكفي سكان قارة إفريقيا
بالكامل، مع مراعاة خشونة فتلة الشعر، لم يغسل وجهه جيدًا؛ لذا
علق بعض العماص بأهدابه، وشفاهه سوداء من السجائر، أسنانه
مصفرة من كثرة تناول الشاي والسجائر.

قطع سرحاني في ملامحه قولته الهادئة التي قالها وهو يقوم
بضرب الكلاكس ليسب سائقًا تخطّاه، ووجه نظره لي، ثم قالها:
- واللّا احكيلك ليه أصلاً؛ وانت مال أمك.

نصيحة ٢

وفقاً لنصائح خبراء الطب النفسي، إذا كنت تشعرُ بالاكتئاب، أو أنك مُقبلٌ عليه؛ مارس التمارين الرياضية؛ فممارستها تؤدي إلى إفراز مادة كيميائية طبيعية في الجسم تدعى الإندورفين، والذي يعمل على تحسين المزاج، ولا تحتاج إلى ممارسة رياضات عنيفة، يكفي ممارسة رياضة المشي لبضع دقائق في الهواء الطلق، أو على البحر، أو النيل.

الحكاية (٣)

الأمبولة بزدانة

أختي لديها طفلان؛ الكبير «بهاء» على اسمي (قال يعني من حلاوة الاسم!)، والثاني محمد، محمد هو كل القصة، يحبّ أمي كثيراً؛ لذا يبيت كثيراً عندنا، وفي إحدى الليالي التي لم أذهب فيها للعمل بات محمد عندنا.

محمد عمره سنتان، يرتدي البامبرز ليلاً لينام به حتى لا يتحفنا بفطيرة من عمائل يديه (مشيها يديه).. جاء الليل وأخرج محمد البامبرز (لأمي / جدته) لكي تلبسه إياه، أمي سيدة كبيرة، ربّتنا على الكافولة، وعلى أنّ الأمبولة العريانة بتشمّ الهوا أكثر، فكان من الطبيعي ألا تعرف أمي كيف يرتدي الأطفال البامبرز، هي لا تعرف نطق اسمه، بتقول «بلبص»، أفكر أنّ أستغلّ الاسم تجارياً، فيما بعد.

قالت له:

- روح يا محمد خبّط على خالتك في الأوضة تلبّسهولك.

ظلّ محمد يطرقُ باب خالته التي لم تسمعه، وطال الطرُقُ وهي لا تستجيب له، كان الجوّ شتاءً، وإذا بمحمّد يقول لها:

- افتحي.. الله يخرب بيتك!

طرق مرّات ولم تستجب له، وما أن فاض الكيلُ به، قال لها:

- افتحي الأمبوّلة بردانة.. يخرب بيتك!

نصيحة ٣

اللعب مع الأطفال كفيلاً بتغيير حالتك المزاجية، فاحرص على اللعب مع الأطفال، أو اصطحابهم للتنزه، أو حتى مشوار صغير في سوبر ماركت تتركهم فيه يتجولون ويختارون ما يريدونه، الابتسامه التي على وجوههم ستساعد على تحسين حالتك المزاجية. لكن قبل أن تصطحبه تأكد أنك خبير في فن تغيير البامبرز.

الحكاية (٤) سما المصري

كنت لسه مخلص كلية جديد، سنة ٢٠١٣، وكنت بحضر لورق الجيش، وفجأة لقيت منتج صديق بيكلمني.. معاك قصة فيلم تنفع لسما المصري؟ اتضايقت قوي؛ إزاي يعرض عليا أكتب فيلم لسما المصري! إيه الهبل دا.. وبكل غضب قلت له «معايا».

ساعتها سما المصري كانت حديث الساعة عشان قناة «فلول»، والهبل اللي كانت بتعمله. المهم قال لي بص، أنا ميهمنيش الفيلم بيتكلم عن إيه، روح لها واتفقوا ع القصة، قالت لك أمين؛ تعالى ونمضي سوا.. قلت له ع البركة.

كلمت سما المصري.. مساء الخير يا مدام سما، أنا بهاء حجازي، من طرف المنتج فلان الفلاني، قالت لي أهلاً بيك يا أستاذ. سألتها نتقابل فين؟ قالت لي تعالالي المكتب الساعة ١٢. بيني وبينك أنا ك بهاء خفت، لسه مخلص كلية بقى والطمع فيا.. روحت واخذ مصطفى صديقي معايا، كان معاه مكنة صيني، بحيث أي حاجة

تحصل ننتّ ع المكنة، زيّ كلّ أفلام الفنانة نيللي كريم (راجع: فتح عينيك، وحبك نار، في الفيلمين كان البطل معاها مصطفى).

المهمّ روحت أنا ومصطفى، كانت شقتها قُصاد قسم الدّقي، تفتح الشّبّاك تلاقي أمين الشرطة بيلعب شنباته في وشك، خلّصت تصوير، وجات قعدت معانا، وكانت قمة في الذوق الحقيقه، قلت لها القصة.. المفروض إنها بتدور حوالين زباله بتهرب مع ظابط شرطة، فقالت لي مينفعش يبوسني واحنا بنهرب؟ قلت لها مفيش مبرر درامي، قالت لي طيب انا أبوسه! قلت لها ملهاش مبرر برضه، ثمّ إيه لزمته! ضحكك ضحكة من بتوع «الهبله العبيطة أم بدوي في ربا وسكينة» قلت لها هخليك تبوسيه.

نجيب مين البطل طيب؟ قلت لها حسن الرّداد، قالت لي غالي ومش هيرضي. حسن عيد! قالت لي محدش يعرفه. طيب المرحوم حسن عابدين! قالت لي إنت ليه حاصرني مع حسن يا أستاذ! خلّيني انطلق. قلت لها انطلقني. قالت لي نجيب حسن يوسف؟ قال يعني دا اللي مش حسن!!.

واحنا قاعدين اتصلت بيها صاحبته، قالت لها إنت فين يا سما؟ قالت لها في المكتب في قسم الدّقي، ما انت عارفاه يا بت.

والحقيقة سما كانت في منتهي الكرم والجدعنة والطيبة، والفيلم الحمد لله متعملش، وانقطعت علاقتي بيها، وفضلت مسجّل اسمها «سما المصري فيلم».

دخلت الجيش، وكان معانا شاويش اسمه محمد فوزي. محمد فوزي شاف تليفوني على الشّاحن قعد يقلب فيه، لقي (فيلم سما المصري)؛ فكّر إنّ دا ملفّ فيديو مش اسم.. قال لي فين الفيديو يا عسكري؟! والله يا عمّ ما فيديو؛ دا اسم. قال لي اطلع بالفيديو يا عسكري وإلا هترقّد! أقسمك بالله دا رقم سما المصري. قال لي يعني لو كلمتها هتردّ عليك؟ قلت له على حسب الأوردر اللي في إيدها. قال لي اتصلي بيها يا عسكري دلوقت. المهمّ علي صوتنا واتلمّت العساكر، واتصلت بيها وفتحت المايك. قالت لي إزيك يا بهاء! فين يا عمّ الفيلم، وفين البوسة... مع ضحكة رقيقة. وبس يا سيدي فيه عسكري داخ منّا خالص، والشاويش محمد فوزي سرّخ في ملكوت الله.. ومن ساعتها الشاويش فوزي بقى يقابلني يقول لي سلّمي عليها يا بهاء.

المُحزن في القصة إنّ الشاويش فوزي مات في الكتيبة، كان بيصلي، دخلوا عليه لقوه ميّت.

نصيحة ٤

علميًا، يعاني معظم المشاهير من الاكتئاب لعددٍ من الأسباب؛ منها انحسار الأضواء، الأزمات المالية التي يتعرّضون لها، العلاقات العاطفية قصيرة الأمد التي يعيشونها؛ لذلك إذا كنت أحد المشاهير، أو حتى تعمل في عملٍ يتيح لك الشهرة (كرة القدم، الغناء، التمثيل)؛ حاول أن تفصل حياتك الشخصية عن عملك.

اجعلُ بهاء الممثل في زاوية، وبهاء الزوج والأب في زاوية ثانية، واجعلُ زاوية الأسرة هي الركن الذي ترتاح فيه من كلِّ أعباء الحياة.. هذا سيساعدك كثيرًا.

الحكاية (٥)

أم محمد

اشتغلت لمدة سنة ونُص، في شركة كانت متخصصة في تفرغ برامج التلفزيون، وعمل ملخص عنها، وتتبع تاني يوم لرجال الأعمال والوزارات في «فايل» صغير، عشان الوزير أو رجل الأعمال ميقعدش يتفرج على كل البرامج.. هو فايل من ٣ أو ٤ ورقات يأخذهم ويعرف كل حاجة، كمان لو وزارة زي التربية والتعليم عاوزه تعرف إيه اللي اتقال عليها في التلفزيون بتيجي تاخذ مشروع، ويتم إرسال كل أخبار الوزارة ليها يوميًا.. والشركة كانت متعاملة مع نُص وزارات مصر تقريبًا، وكان فيها شغل كثير جدًّا، لحد ما روحت انا.. تقريبًا كل المشاريع اللي كانوا مُتعاقدين عليها اتفَسخت (محبّش اتكلّم عن نفسي كثير).

مش دا موضوعنا، المهم.. أنا كنت شغال من 12 بالليل لـ 8 الصبح، أنا الحقيقة بعزّ الشغل بالليل، يمكن عشان أنا محبّش الزحمة، محبّش الدوشة، ويمكن عشان بالليل القاهرة بتبقى أجمل، عشان أفضى وأزوق، وفيها هوا نضيف ممكن تتنفسه.

كنت بصحى الساعة ١١، ألبس وانزل أوصل ١٢ وربع..
ونص، المهم لازم اتأخر (أصلي برضه بعز التأخير قوي)، المهم
في يوم صحيت من النوم الساعة ١٢ اللي هو لو وصلت الساعة
٢ أبوس إيدي شعرو ودقن، لكني قررت إني ألبس واروح، وهي
وظروفها.

معرفة عيني انطرفت واللا إيه، فقايم من النوم عيني مدمعة
قوي، وعمالة تنزل دموع لوحدها، سندات راسي ع الشباك، ودفعت
الأجرة، من نص الطريق ركبت ست كبيرة وقعدت جنبي.

السواق قعد يقول اللي مدف عش الأجرة يبعت، الست بصت
عليًا لقت عيني مدمعة:

- متعيطش يا حبيبي، هدفعلك أنا.

حاولت أفهمها إني صحفي، وإن ليا شعبيتي اللي تسد عين
الشمس! وإن عندي ١٢٠ فولورز على الفيس بوك!

- أص..

قاطعتني:

- بتحصل عادي. يا ما ناس نسيوا محافظهم، عادي ميهمكش.

أنا مرّة محمد ابني نسي لباسه وهو نازل.

قعدت اتخيّل محمّد وهو نازل من غير لباس؛ فابتسمت. قالت لي:
- ومرة ثانية المفصوح خدّ فردة جزّمة وفردة كاوتش من بتوع
اخته، ونزل، ورجع يتخانق معايا عشان حاطّه الكاوتش جنب
الجزّمة!

ضحكت، قالت لتكمل حكايات محمّد الذي ينسى دائماً:
- والله مرة نسي التليفون بتاعه وخدّ الرّيموت بتاع الريسيفر،
وكان سايلنا التلفزيون على الشيف حسن.. قعدنا لحدّ ما رجّع
نتفرّج ع التّكات والحركات.

الكلام خدنا ونسيت أقولها إنّي دفعت الأجرة، قالت لي:
- ادعيلي انت بس بنتي تخفّ من السرطان.
سكتّ، مرضيتش أتكلّم، أو مقدرتش اتكلّم، بوست على
رأسها، ساعات كتير يكون الصّمت أبلغ من كلام كتير.
عظيمة هذه السيّدة، أمّ محمد، الذي ينسى ابنها كلّ شيء، شفّى
الله ابنتك، وأراح قلبك وقلبها.

نصيحة ٥

فكرة وجود ابن أو ابنة مريضة في المنزل، لا يجب أن تكون فكرة مرهقة، في النهاية هو اختيار الله، واختبار منه؛ لذا تعامل مع الأمر بمُنتهى البساطة، تابع العلاج، وحاول ألا تُشعرهم بشيء، أو إذا اختصك الله بمرض معين فهو اختبار من الله.

﴿ يقول الله - عز وجل - في سورة البقرة (وَلَنَبْلُوَنَّكُمْ بِشَيْءٍ مِّنَ الْخَوْفِ وَالْجُوعِ وَنَقْصٍ مِّنَ الْأَمْوَالِ وَالْأَنْفُسِ وَالثَّمَرَاتِ * وَبَشِّرِ الصَّابِرِينَ)، وفي سورة محمد (وَلَنَبْلُوَنَّكُمْ حَتَّىٰ نَعْلَمَ الْمُجَاهِدِينَ مِنكُمْ وَالصَّابِرِينَ وَنَبْلُوا أَخْبَارَكُمْ)، ويقول الرسول الكريم: «إِنَّ اللَّهَ إِذَا أَحَبَّ عَبْدًا ابْتَلَاهُ»^(١).

حاول أن تتعامل مع الأمر ببساطة، لو مُنفسك لا يُجدي نفعًا.
أدعو الله من أنعم بالبلوى أن ينعم بالصبر.

(١) بعض المصادر تضعف هذا الحديث، وهنا حب الله ليس بالضرورة مرتبطًا بالابتلاء؛ فالله يحب من ابتلاههم، ومن لم يبتليهم.

الحكاية (٦)

كنت لسه في نفس الشغلانة اللي حكيت عنها قبل كده، وكان من نصيبي إني افرغ برنامج توفيق عكاشة، وتوفيق عكاشة من بتوع الليل وآخره. كان ممكن يقعد بالست ساعات يحكي عن مشاكل حياة الدرديري مع حماتها، ويقعد يحكي مع اللي بيتفرجوا عليه كأنه راجل قاعد على المصطبة، قعدنا نضحك عليه وعلى طريقته، ومكناش واخدين بالنّا إن فيه ملايين، سواء مغنيين أو بسطاء، دي الطريقة الوحيدة اللي ممكن توصلهم بيها، وبرضه مش دا موضوعنا.

كالعادة صحيت من النوم الساعة ١١ قعدت اسكروول على الفيس، ولقيت ١١ رسالة، أنا نايم الساعة ٤ أصلاً، يتبعت لي ١١ رسالة، فرحت قوي، وحسيت بكينونتي، ٩ رسائل منهم من بتوع «أرسلها لعشر من اللي عندك حتى لو كنت أنا»، ورسالة «مهندس اتصالات اخترق الشبكات الثلاثة»، ورسالة من عبد الله عاوزني اجيبه معايا حواوشي من ابو جنيه وربع اللي عارف إن الرّاجل

بيدبح حيوانات ضالّة وبيحشيها في السّاندوتشات، بسّ بيحبّها،
حاولت أقنعه يبطل، والحمدُ لله أقنعني إنّي آكل معاه.

تقلت الهدوم، ولبست جاكيت الجلد اللي بيخليني شبه
نيكولاس كيچ، أو بدرية طلبية، وركبت العربية، كان الواحد بيطلع
دخان من كتر التلج. المهمّ يا سيدي، الدنيا كانت برّد من اللي هو
بيخشّ جواّ العضم دا.

ركبت العربية، ولقيتّ راجل كبير في السن ركب في العربية،
راجل كدا من الناس اللي أوّل ما تشوفها تحسّ إنك قابلتها، كدا..
«وشّه من النوع المألوف.. حلوف ازاي!»

المهمّ يا سيدي، لمينا الأجرة، والسّواق فضل يشغل في أغاني
حزينة وكوكتيل الإحباط الجميل «طارق الشيخ، وسمسم
شهاب، ومصطفى كمال.. ولما ربّنا فتحها عليه واتبسّط شغل
حسن الأسمر»، وصلنا لحالة.. اللي هو يا ربّ العربية تنقلب
عشان نخلص.

ولما اتنحررت وقلت له:

- ما تشغلي يا اسطي حاجة فرايجي.. أنا نفسي صعبت عليّ

يا أخي.

ضحك لي كدا، وقال لي:

- ما تقول من الأوّل يا حمادة!

لقيناه شغل محمد محيي، فعرفنا إنه يوم إسود، والعربية كانت
بطيئة أصلاً، اللي هو ليلة مش فايته على دماغك يا عبد الله انت
وبتاع الحواوشي بتاعك، وتوفيق عكاشة وحياة الدرديري..
العربية وصلت والراجل الكبير في السن دا يا حبيبي لسه نايماً.

﴿ قلت لازم أصحيه.. بصراحة خُفت ليكون ميت وتيجي
الحكومة ترفع البصمات، هيلاقوا بصماتي انا، ساعتها هحلف
إن الأستاذ طارق الشيخ هو اللي قتله.

يا حاجج.. يا عمي.. يا خال.. وفضلت أهرّ في دراعه شوية،
قلبي وقع في رجليّ.. وقلت في نفسي «دا مات، الله يخرب بيتك يا
بهاء»!

وبعد دقيقة بصلي كدا بطرف عينه، وقال لي:

- حضري العشا يا سميحة عشان ألحق الشغل.

واتمطع كدا، ورفع إيديه لفوق زي أحمد عدوية، ونام تاني.

نصيحة ٦

صحيح إحنا كجيل جديد عندنا مشاكل كتير مع الأجيال الأكبر منّا، بس دي مش مشكلتنا صدقني، ولا مشكلتهم، هو انت فاكر إن جيلهم مكانش عنده مشاكل مع الأكبر منه، والد صديقي بيحكلي إن ابوه كان شايفهم جيل بايظ، وجيل البنطلونات الشيرلستون، والخنافس والسوالف الأعرض من شارع صلاح سالم، والد صاحبي نفسه شايفنا إحنا جيل بايظ، وإحنا هنشوف الجيل اللي بعدنا كدا.

الأزمة إن إحنا اتربينا غلط، إتربينا إن الحياة ليها منظور واحد، وطريقة عيش واحدة، وأتعلّمنا إن إحنا بس الصّح، ودا اللي بيخليك تبص للجيل التالي إنه مش صح، أو ابقوا تعالوا تفوا على قبري لو نجحتوا، اللي هو يبقى الراجل طالع عينه عشان ينجح، وانت بتطالبه إنه يتفّ على قبرك (مخمضة بنت ستين في سبعين).

سبب من أهم أسباب مشاكل الأجيال الجديدة أو جيلنا، حالة الغربة اللي بيعيشوها، مفيش نظام بيضمّ الأجيال دي، والأسرة

أصلاً بتساعد في دخولهم في حالة الغربة دي، فيا ريت نسمع
بعض، ونفهم بعض ونساع بعض، وواسعة ورايا حضرات والله.

وزي ما قال ريكي جيرفي:

كلّ جيل يقول إنّ الجيل الذي قبله قاسي وغير مستنير، والجيل
الذي بعده هشّ وساذج.. لا شيء يتغير. أنت فقط تنتقل من جيل
إلى آخر، ثمّ تموت. من الأفضل أن تستمتع بالرحلة.

الحكاية (٧)

علاء.. مستشار عاطفي

في سنة ٢٠٠٩، كنت بحبّ واحدة جدًّا، كانت زميلتي في الكلية (أنا خريج كلية إعلام جامعة القاهرة).. الموضوع كان غريب، أنا في العادة مُتكلم ورغاي، وآلة كاتبة ومتعرفش توقّفي، بسّ آجي قدامها واقلب بطة بلدي، الموضوع ضايقني.. يا عمّ أنا فيه كلام كثير عاوز اقله ليها، آجي قدامها أتتيل واسكت، ومش بسّ اسكت؛ دا انا برُدّ ردود غريبة جدًّا.. مرّة قالت لي «خالتي تعبانة يا بهاء»، قلت لها «عقبال أمك»، قالت لي «تعبانة، مش رايحة تحجّ!» قلت لها بكلّ برود «ربّنا يرحمها ويصبرّكم».

الموضوع كان غريب فعلاً، الكلام كان بيطلع لا إرادياً.. تحسّ
إني حافظ وأما اقابلها برُصّ اللي حفظته، مبشغلش عقلي
فيه خالص. المهمّ في الأوقات دي بلجأ لمستشاري العاطفي
«أخويا علاء» قلت له:

- إلحقني يا معلم.

ضحك ضحكة العالم ببواطن الأمور، وقال لي:

- بصّ يا بهاء، في أغنية لتامر حسني بتقول.. لما بتكون بعيد..
بحضّر كلام أقوله واما بتكون قريب..
بتنسيني اليوم بطوله.

- أيوه، يعني أغنيها يا علاء!؟

طبعا علاء قال لي بلاش؛ لو غنيتها مش هنضمن العواقب.
وضحك ضحكة مخيفة، فأنا أقلعت عن الفكرة (شكرا علاء..
شكرا فاتيكا)، قال لي:

- بصّ يا ريس، إنت هتقولها الكلمتين دول وتبصّ في عنيا.
وبعدين ما انت يا عم بتقرا في كتب ليل ونهار! قولها أيّ كلام، وبعدين
قولها بحبك.. هتقتنع على طول، البنات بتحبّ اللي يقولها بحبك.
- حاضر يا علاء.

اتصلت بيها.. إحنا لازم نتقابل. قالت لي خير!. قلت لها مفيش،
فيه موضوع مهمّ عاوزك فيه. قالت لي خير بس، في إيه؟ قلت لها
تعبان، ول لازم اقابلك عشان ارتاح «إيه الكلام الإيجائي دا».

المهمّ فضلت طول الليل سهران لأننا هنتقابل الصبح، واضرب
قهوة، واضرب شاي، واضرب في احمد المرسي نفسه (صديق
السكن).. رocht بقي أقابلها في جنينة الأورمان اللي قدام جامعة

القاهرة، والّي في ٣ أثروا في تاريخها الخديوي إسماعيل الّي أنشأها،
ومبارك الّي جدّدها، وأنا أكثر حدّ زارها. روجت وعيني مش
قادر أفتحها، حرفيًا مش شايف قدّامي، شفتها وهيّ كانت لابسة
شيك جدّا، أوّل ما شفتها كنت فصلت خالص، هموت وانام.

قلت لها:

- أنا عاوز انام، بصّي هموت وانام؛ بسّ انا بحبك.

«البتّ وشها جاب 100 لون، مش عارف ليه مخدمش كلمة
«النوم» بالمعنى الطبيعي للكلمة! قالت لي «إنت سافل وقليل
الأدب». أنا كلّ الّي في دماغي إنها «زعلت من كلمة بحبك»،
أصل إيه الّي يزعل في واحد عاوز ينام؟! عيني بدأت تبرّش
من قلة النوم، روجت باصص في عينها، بناءً على نصيحة علاء
«ربّنا ينتقم منك يا علاء».

وقلت لها:

- طيب يا ستي، أنا مبحبّكيش، بسّ هموت وانام، أعمل إيه؟!
بسّ يا سيدي.. وصوابها لسه معلّمة على وشي لغاية دلوقت.

نصيحة ٧

العلاقات العاطفية اللي بتتم في الجامعة واحدة من أهم أسباب الاكتئاب، في الغالب إنت بتكون مشاعرك خام، فبتستهلكها في علاقة في الغالب مبتكملش! في الفترة دي بيبقى كل حاجة عندك بيور، حب.. إخلاص.. اهتمام... غيرة؛ كل الحاجات دي بيبقى مخزونك منها محدش قرب منه؛ لذلك انت بتعاني أعراض انسحاب رهيبه، لما القصة تفشل.

لذلك حاول قبل ما تدخل أي علاقة في الجامعة تحسبها بطريقة تانية، وحاول متنجرفش، اقرأ كتاب عن العلاقات العاطفية، خليني ارشحك هنا مثلاً كتاب:

رواية غسطينو مأساة المراهقة - ألبرتو مورافيا.

كتاب فن التعامل مع المراهقين، مشكلات وحلول - ناصر الشافعي.

كيف يفكر المراهقون؟ - جيلي إلي.

العادات السبع للمراهقين الأكثر فعالية - شين كوفي.

بنات الثانوية - صفاء محمود.

هذه الكتب يُنصح بها للأهل لمعرفة كيفية التعامل مع نفسية

الأبناء في هذه المرحلة الحرجة.

📌 وفقاً لاستطلاع أجرته على 200 طالب من طلبة جامعة

القاهرة، كان أكثر من 90% يبحثون عن الحب بسبب رغبتهم

في الإحساس بالقبول من الطرف الآخر.

فخذها قاعدة قبل الدخول في أي علاقة: «أنت لا تريد الحب؛

بل تريد الإحساس بالقبول من الطرف الآخر».

الحكاية (٨)

البفّفة

أيّ حدّ دخل الجيش بيستلم مِخْلة في بداية الجيش، وبيسلّمها في نهاية الجيش. بيسلّمها زيّ ما استلمها، بل وأحسن. بيسلّمها متكيسة ومتظبّطة ومكوية وكلّ حاجة، يعني فلنترض إن عسكري قضى ٣ سنين جيش، مطلوب منه يسلم بيادتين جُداد كأنهم متلبسوش، ويسلم الهدوم الداخلية، والأفرولات (البدلة العسكرية) اللي قضى بها ٦ شتا و ٦ صيف.. كلّ دا قابل للتحقق، لكن اللي مش قابل إنك هتسلم الهدوم الداخلية جديدة.. طيب ازاي؟

في حدّ عندنا كان عنده تبوّل لا إرادي.. في مركز تدريب خرم المرتبة اللي بينام عليها.. آهو دا مطلوب منه يسلم الشورت البفّفة بتاعه تاني! طيب هتعملوا إيه في بفتّي.. يقلك هنشيلها لك لما تيجي استدعا! طيب معلش مُمكن تحطوا مع كلّ مِخْلة شورت جديد، ويبقى العسكري يدفع تمّنه يقلك لأ طبعًا.. كلّه إلا البفّفة.. تحسّ إنها بفتّة ضاني.

المهمّ أنا دخلت الجيش ٢٢ يناير ٢٠١٤، وسلّمت خدمة يوم ١ مارس ٢٠١٥.. المهمّ جيت أسلم المخلّة ملقيتش الشورت البفتة. اللي بيستلم المخلّة كان شاويش مكانش بيحبّني.. روحت قلت له معنديش بفتة. قال لي مش مشكلتي اتصرّف. طيب أدفع فلوس البفتة وسيبوني امشي. يقولي دا لا يقدر بتمن. ليه يا عمّ طيب!! المهمّ.. بقيت ماشي في الكتيبة، قبل ما اقول لحدّ صباح الخير اقوله اخلع بنطلونك ورّيني لابس إيه. واكتشفت إنّ قطنيل غزت الجيش. ولقيت حدّ لابس بوكسر سبايدر مان، لدرجة إنّي روحت سألت الصّولات عن شورت بفتة.. صول منهم قال لي والله يا بني أنا مبلبوسهمش، مراقي عملتهم مرايل مطبخ.

﴿ قعدت يوم كامل أدور على الشورت البفتة.. المفروض بذكره امشي من الجيش، بسّ مش همشي غير لما اسلم البفتة. نمت في اليوم دا وانا مش شاغلي الصّراعات السياسية، ولا برنامج فيفي عبده، ولا أغاني محمد منير.. كلّ اللي شاغلي هو الشورت البفتة، لدرجة إنّي حلمت بأمل دنقل بيقول لي:

أترى حين أفتح مخلتك ولا أجد بفتتك.. فهل تُرى.. هي أشياء
لا تُشترى

صحيت من النوم، روحت على عسكري «حملة»^(١)، عارف إنّه

(١) عساكر الحملة.. هم العساكر المختصين بصيانة وقيادة المركبات في الجيش

بيلبسهم، قلت له إنتَ الأمل، فين بفتتكَ؟ قال لي لابسها، قلت له
أقلعها. وغسلتها وسلّمتها، وحسّيت بجبل كبير من الهموم انزاح
من على قلبي؛ لذا أهديت كتابي (قصف جبهة) لبفتة زميلي.

وصدقَ المثلُ الصّيني القائل «لا تُعطني بفتة، ولكن علمني
كيف أسلّم المخلة».

نصيحة ٨

مرحلة الخدمة العسكرية في أيّ دولة مرحلة صعبة جدًا، ليه؟ نمط حياة صعب، حياة مش متعوّد عليها، وسائل الترفيه معدومة؛ لذلك أنت عرضة للإصابة بالاكئاب، فحاول تتعامل مع الفترة دي على إنها فترة وهددي، هي الريدي فترة محدودة، مش بقية حياتك اللي هتعيشها.

وخلي بالك ٣ حاجات هتغير في شخصيتك تماما؛ الجيش (جربته)، والسفر (سافرت قطور في الغربية)، والسجن (محصلش، بس حاسس بعد الكتاب دا ممكن، وعلى الله التساهيل).. فخلي بالك ودرّب نفسك إزاي تتعامل مع الثلاثة من غير ما تضرّر نفسك، أيّ حاجة تضايقك تعامل على إنها مؤقتة، واشتغل على إنك تنهيها في وقت أقلّ من وقتها، وحافظ على بفتك.

الحكاية (٩) أمي والأسعار

عندي مشكلة كبيرة مع أمي، مرتبطة بالأسعار، أمي ست بركة، مراحتش ولا جات، فعندها فجوة زمنية في الأسعار، يعني الجزمة حلو قوي تبقى بعشرين جنيه.. لو بـ ٣٠ يبقى غلبوك فيها طبعًا.

لذلك أنا واخواتي قررنا إننا نقولها أسعار أقل بكثير للحاجات اللي جنبناها.. سعر لا يتعدى ١٠٪ من سعر الحاجة. يعني جبت تيشيرت بـ ٢٥٠ يبقى سعره ٢٥ جنيه، وساعتها هتبصلك عليه وتقولك ضحكوا عليك بس ماشي.. ماشي بتاعتها دي شهادة أفضل من الأيزو.

المهم.. مرة وانا في ثانوي، جيت القاهرة (أنا من سوهاج) اشتغلت، وروحت جبت هدوم من المركز (جرجا). المهم.. تيشيرتات على بنطلونات، تقريبًا كانوا بـ ٣٠٠ جنيه، وساعتها الـ ٣٠٠ جنيه دول كانوا رقم كبير. أنا أصلًا كنت ماشي بدوس على بني آدم من إحساس العظمة اللي كان متملكني.. وحسيت إنني من

الأغنيا الظلمة، وسمعت أغنية فيلم شيء من الخوف «الضحكة دي.. العفشة دي».

إيه يا بهاء الهدوم الحلوة دي! وإيه البنطلون اللي شبه بنطلون الفنانة شيريهان دا. بكام يا بهبوهة.. وطالما أمي قالت بهبوهة تبقى بتمكّر، وعاوزه تجرجرني في الكلام زي زينب جاد الله وعاطف السكري في العيال كبرت! قتلها بـ ٤٥ جنيه. قالت لي وانا هبلة يا بني! دول ميقلوش عن ٧٥ جنيه.

آه يا ماما، يا شاطرة.. صحّ، بسّ للأمانة همّا بـ ٨٠. قالت لي: لا.. حلوين يا بهاء، شطور مغلوبوكش المرة دي. خد آهو ٨٠ وبكره هات زيهم لابن خالتك.

وهكذا أيّ حاجة اقول سعرها أنا بلبس زيها لابن خالتي، لاخويا، لجاري، لابن بنت بياعة اللبن! المهمّ يعني إنّ في تغريمة وخلاص.

من فترة راجع من الشغل فجبتلها عيش فينو، الصّباع أطول منّي أنا شخصيّا. الصّباع بـ ٢ جنيه. قالت لي إيه الفينو الحلو دا! قلت لها ورخيص والله. عاملين عليه عرض، الواحد بنصّ جنيه. بجدّ يا بهاء واللا بتكذب! أنا عمري كدبت عليك يا ستّ الكلّ! لا إنت طيّب (معلومة مغلوطة). حلو.. بكره جيبنا بـ ٥٠ جنيه، ونوزّع ونديّ الجيران.. يعني انا هدفع ١٠٠ جنيه. وكأني دافع ٢٥.. شفتوا الاستثمار الناجح.

من فترة جبت جزمة من باتا، المكان الوحيد اللي بلاقي فيه مقاسي، الجزمة كانت بـ ٣٧٠.. كانت خفيفة جدًا، دلوقتٍ بستخدمها كمركب شراعي لما بروح النيل أو لما حد يرش كمتريل في الجو. المهم.. أمي عجبته الجزمة دي.. بكام يا بهبوهة؟ قتلها الحقيقة دي بـ ٣٧٠ جنيه.. بس صار فينهيالي في الموقع هدية.. أنا خُفت اقولها بسعر أقل البس في جزمة تانية.

راحت قالت لي:

- إنت بتضحك عليا، ما انا شفت الفاتورة، جايها بـ ٣٧

جنيه يا خايب.

نصيحة ٩

تعرف إن موضوع الأسعار والشوبينج من الحاجات اللي بتجيب اكتئاب، ودا من كذا جهة، مثلاً عدم القدرة على الشراء بيسبب اكتئاب/ الاضطرار في تخفيض منتجات عشان الظروف الاقتصادية؛ دا بيسبب اكتئاب، وخاصة لو كانت الحاجات اللي اتخففت أو اتلغت من بند الشرا حاجات تخص الأطفال.

علمياً، الست بتشعر بالملل من الشوبينج بعد ساعتين، الرجال بيحس بنفور منه بعد تلت ساعة، فوالله إحنا ربنا خلقنا كدا، فرفقا بنا.

الحكاية (١٠) الأحمر يليق بي

وأنا في الابتدائية، كنت تقريبًا أشطر ولد في المدرسة، كنت على طول بطلع الأول، عندي شهادات تكريم كثير جدًا، كنت مصدر فخر لعيلتنا، اللي التعليم فيها أقل من التنمية في حكومة مصطفى مدبولي، المهم يا سيدي، جات مرات عمّي استأذنت أبويا تأخذني معاها مشوار لحدّ المركز.

أبويا قال وإيه يعني، خدوه، بسّ خلّوا بالكم منه، كنت في تانية ابتدائي، أبيض، وشعري أصفر (أرجوك متجيش صورة حديثة وتقعّد تقارن.. النتيجة هتصدمك). المهم يا سيدي.. روحنا المركز، قعدنا نلفّ شوية على المحلات، كان معايا مرات عمّي وبنت عمّي، والاتنين لفّفوني المركز كله، وآيس كريم وبطاطا (قمة السّخونة وقمة التلج!) اللي هو احنا هنروّحلك ابنك يا عمّ أحمد عنده تلبّك معوي.

المهم.. دخلنا محلّ ملابس، كنت على آخري، وبصراحة كنت عاوز أروح اتفرّج على مجلس الشعب، السيد أحمد فتحي سرور

كان الساعة ٧ كدا بيخبّطله بتاع ١٣٠ واحدة «الموافق على هذا القرار يتفضّل برفع يده».. وقبل ما يكمل رفع يده يقول موافقة!! الأستاذ أحمد فتحي سرور كان أسرع واحد ينجزلك قوانين، اللي هو لو عاوز تخلص قوانين شمال إفريقيا كلها ممكن يعملها لك كلها في جلسة واحدة، وتلحق مسلسل الساعة ٨ عادي.

دخلنا محلّ للملابس، قالت زوجة عمّي:

- بصّ يا بهاء.. أنا ابن واحدة صاحبتني قدك عاوزه أجيب له طقم هدية، وأحنا من فهمش في ذوق الأطفال؛ ممكن تساعدنا نختار له لبس.

الحقيقة، أنا كنت تعبت وقرفت وزهقت، روحت اخترت أسوأ طقم في المحلّ كله، كان طقم لونه أحمر؛ بنظنون أحمر.. وتيشيرت أحمر، اللي هو اللي هيلبسه كأنه رايح يتعدم.

مش قادر افكر هل أنا اخترت الطقم دا لأنّي كنت طفل غلاوي واتضايقت إنهم بعد المشورة والسحلة اللي سحلوهالي هيجيبوا لبس لابن طنط اعتماد، واللا إني اخترت الطقم دا لأنّي كنت طفل معفن ومعنديش ذوق!! القصد يا سيدي.. شالوا اللبس، والشنط والشوبينج، وركبنا حنطور للبلد، ساعتها مكانش الاختراع اللطيف اللي اسمّه التوكتوك نزل البلد. أنا ركبت الحنطور

مرّة في حياتي، ومرّة تانية كنت هر كبه مع واحدة بحبّها، ومتفقتش مع سواق الحنطور.

وعند البيت، نادوا على أبويا.. يا عمّ احمد، يا عمّ احمد. طلع ابويا نزلني من الحنطور، وحاول يمسك فيهم، لكنهم أصرّوا يمشوا. المهمّ يا سيدي.. الحنطور اتحرّك، راحت مرات عمّي نادت عليّا.. يا بهاء.. بهاء.. يا بيبو.

أول مرّة حدّ يقولي يا بيبو، جريت اللي هي جرّة البطة لما تبقى بطنها مليانة، اللي هي بتجري تلوء دي.. تلوء (أيوه.. إنت قريتها صح).

- أيوه يا مرات عمّي.

باستني، «قبّلتنني»، أعطتني قبلة:

- خدّ يا حبيبي اللبس دا عشانك، كلّ سنة وانت طيب؛ النهارده عيد ميلادك.

كنت هموت من الفرحة عشان الطقم وعشان اللقطة الرومانسية، وكنت هموت من الجلطة عشان الطقم المعفن اللي انا اخترته، وافتكرت.. من حفر حفرة لابن طنط اعتماد.. لبسها الصبح، وراح بيها المدرسة أحمر في أحمر.

نصيحة • ١٠

جزء كبير من أسباب تعاستنا واكتئابنا ومرضنا وفلسنا، لا مش هو الرئيس؛ هو جزء كبير برضه، بس مش قصدي عليه، الجزء اللي أقصده هي الأفكار السلبية. نصّ الطريق اللي بيساعدك تتخلص من الاكتئاب هو ازاى تغيّر طريقة تفكيرك ونظرتك للأمر، تعرف تخوض حرب ضدّ عقلك انت، وتغيّر طريقة تفكيرك، متقولش انا مفيش حدّ بيحبّني.. لا، تعالى يا عمّ إيه دليلك إنّ مفيش حدّ بيحبّك؟ أصل البنت اللي بحبّها سابتني، ما في داهية يا سيدي، دا مش دليل، دي حالة فشل قد تكون انت الكسبان فيها أصلاً، وهكذا أعدّ التفكير في المسلمات اللي واخدها عن نفسك؛ لأنّ العقل الباطن بيتأثر بالمسلمات دي.

الحكاية (١١) بطاقة أميرة

كنت انا حلو كدا ٨ أو ٩ سنين، أبويا (رحمة الله عليه) مَحْفَظته
أُتسَرَقَت، وكانت ساعتها البَطَاقِيق الورق أم صور فوتوغرافية
دي، (وبرضه الصّور كانت وِحْشَة)، ومشوار إنك تطلع بطاقة
مُقرَف جدّا، المهمّ أبويا قرّر إنه هيمشي بجواز السّفر لحد ما يفضي
ويطلع بطاقة.

بعد يومين كنت معدي من قدام (البوسطة)، الموظف نده
عليّا، وقال لي فيه جواب لأبوك، استلمته والموظف مضى قدام
اسم ابويا إنه استلم، وانا ماشي طول الطريق بفكر إيه اللي ممكن
يكون في الجواب! لدرجة إنّي فكّرت إنّ يكون جواّ الجواب شقّة
من بتوع وزارة الإسكان (ما هي ٣٥ متر) المهمّ استنيت لما ابويا
جّه من الشغل وادّيتهوله، وفتح لقي إيه!!؟ لا، ملقاش المحفظة
يا متسرّع يا أهوج؛ لقي بسّ البطاقة، وورقة.. الحرامي كتب فيها
«معلش؛ أصل انا عارف قدّ إيه إنك تطلع بطاقة هيبهدلك، ويا
ربّ تكون مسامح في الفلوس»، وفاكر إنّ ابويا ساعتها قال إنه

مسامح، الحرامي خطّه كان كويّس جدًّا، أيّام ما كان عندنا حراميّة
خطّهم حلو.

النهارده كنت ماشي أنا وعبد الله (صديقي بتاع الحواوشي)،
لقينا بطاقة بتاعة واحدة اسمها أميرة، فقلت لعبد الله الساعة ٨
تيجي نعمل خير، ونرجع بطاقة أميرة؟ عبد الله بصّ في ساعته اللي
هيّ أصلاً مش شغالة، بسّ واضح إنّه كان لسّه بدري، فقال لي يلا.
ودورنا على شقّة الستّ ووصلنا البطاقة، مقدرش اقولك فرحتها
قدّ إيه علشان أنا أصلاً مشفتش فرحتها قدّ إيه الحقيقة.

❖ دخلت أنا وعبد الله على العمارة بتاعة أميرة دخلة ظابط وأمين
شرطة، وعبد الله ضارب النّضارة اللي هيّ بيلبسها بتوع أمن
الدّولة دي، وأنا ضارب كرش ظابط فاسد تخن من كُتر القعدة
في المكتب، المهمّ طلعت ملقُتُش أميرة في شقتها، نزلت لقيت
ميكانيكّي في الدّور الأرضي، قلت له:

- أميرة حنفي الزّهار ساكنة هنا يا جدع أنت؟

اتلجلج في الكلام:

- لا يا افندم.

عبد الله ضحك له ضحكة مُخيفة، فالراجل اتلجلج أكثر،

والمفتاح وقع من إيده.

- كانت ساكنة هنا وعزّلت.

فَضِلْنَا نَسْتَجُوبُ فِي الرَّاجِلِ، الَّتِي كَانَ شُويَّةً وَهِيَ عَرَفَ هُوَ مَخْبِي
المخدرات فين، لحدّ ما لقينا وشّه جاب ألوان، فادّيناله البطاقة،
الحقيقة الرّاجل الّتي كان بيتكلم بتحفّظ، بقى فرفوش قوي، وكان
ناقص يركبنا شكمانات من الفرحة.

إحنا لو في دولة محترمة كان زمان الستّ طلّعت بطاقة بسرعة،
بسّ لأننا بلد مش مُحترمة؛ فالستّ هترجع بيتها تلاقى البطاقة
فتفرح قوي، وودي ميزة يعني.

طبّ إيه الدروس المستفادة؟

- زمن الحرامية الجدعان ولّي، وأكيد خطّهم مبقاش حلو.

- الواد عبد الله الميهي مبيمانعش في فعل الخير، بسّ لازم يبصّ
في ساعته الأوّل، الشغل شغل.

- أحسن وقت تعمل فيه خير السّاعة ٨.

نصيحة 11

بنسبة كبيرة إنت مش عارف قد إيه فعل صغير ممكن عمله
ممكن يآثر في نفسيّة حدّ؛ لذا متكسّلس في عمل خير. وعن تجربة..
الخير دايرته على قد ما هيّ كبيرة بس هتلاقيها بتيجي عند نقطة
ارتكازك وتقف تاني.

الرّسول - صلى الله عليه وسلّم - يقول: «الخير في أمّتي إلى يوم

القيامة».

الحكاية (١٢)

التاجر علي

في سنة خامسة ابتدائي، كان عندنا مسرحية اسمها (علي والتاجر) كانت مسرحية غاية في العقم، بتحكي عن علي اللي حبّ يسافر فإدى لتاجر في قريته بلاص فيه فلوس.. التاجر خد الفلوس، وبعد ٣ سنين لما علي رجع رايح يطالب التاجر بالبلاص.. فإداله بلاص فيه زيتون. يا عمّ البلاص فيه فلوس.. التاجر يحلف إنه زيتون.. وعلي يحلف إن فيه فلوس. راحوا للقاضي وحكوله. فجاب خبير زيتون.. آه والله همّا قالوا خبير زيتون! دا بيكتب في السّي في بتاعه (خبير زيتون، وبين قوسين «أخضر واسود»).

المهمّ.. الخبير داق الزيتون قال إنه محطوط من شهر.. فكدا التاجر حرامي؛ لأنّ لو «علي» حطّ زيتون كان بقاله ٣ سنين فعلاً. وكان زمانه بقى إسود. المهمّ.. الأبله بتاعتنا قالت عاوزين نمثّل المسرحية. أنا كنت من أشطر الناس في الفصل؛ فلأزم ليّا دور. أعمل دور علي يا أبله. لأ يا بهاء، علي طيب. دا على أساس إنّي بثبت الطلبة في الفسحة! ما انا طيب آهو. طيب اعمل دور القاضي؟ قالت لي

لا يا بهاء القاضي حكيم وراسي. يا ستي وانا يعني بدلدق تهوّر! ما
انا حكيم وبسمّع حكيم، وحتى حافظ أغنية السلام عليكم.. إس
إس إس! وانا قلبي سلّم يا حبيب رُدّ السلام.

- خلاص يا أبله هعمل دور البلاص.

- مش هينفع نحشيك زتون.

- يا سلام! (قال يعني هوّ دا بسّ العائق).

- بهاء، إنت هتعمل دور التاجر الحرامي.

روحت صارخ الصرخة بتاعة محمد صبحي في مسرحية (سكة
السلامة)... أنا لا يمكن أبدأ أعمال الفنية بدور حدّ شرير.. جمهوري
اتعوّد عليّا طيب مش شرير. ثمّ يعني مفيش حرامي خدوده تعشي
كلبين يا أبله! (كنت ملظّل كدا، وبخدود).

قالت لي خِصّ الكلام يا بهاء، هتعمل دور التاجر الحرامي؛
لأن انت ملامحك مُقنعة كشرير أكثر. كلّ العظام كانوا شريرين؛
محمود المليجي، وتوفيق الدقن، ونبيلة عبيد.. قلت لها أوك،
هعمله.. طيب مينفعش تديني دور واحد من الحراس؟ لا. طيب
دور الكرسي اللي هيقعد عليه القاضي؟ لا. طيب دور مرات علي
ونحطّ مشهد كدا؟.. برضه لا.

رَوَّحت قلت لابويا الأبله عاوزاني اعمل دور حرامي في المسرحية. أبويا قال لي وما له.. حرامي حرامي، المهم تمثل كويس.

رُحِت حَافِظِ الْمَسْرَحِيَّةِ كُلِّهَا.. الِّي كَانَ بِيَعْمَلْ دُورَ عَلِي (صديقي أحمد عبد الرحيم) رُحْنَا الْمَسْرَحِيَّةِ، وَأَنَا حَافِظِ الْمَسْرَحِيَّةِ كُلِّهَا، بَقِيْتُ أَقُولُ جُمْلَةً مِنْ حِوَارِ عَلِي، وَجُمْلَةً مِنْ حِوَارِ التَّاجِرِ.. وَالْأَبْلَهَ تَقُولِي يَا ابْنِي التَّزَمْ بِالنَّصِّ. حَاضِر يَا أَبْلَه.

في اليوم دا جِئنا اَحْنَا حلاوة بدال الزتون؛ عشان مفيش زتون ساعتها، هنكفر يعني!

جينا يوم العرض ملقيناش الحلاوة أصلاً.. في حدّ سرق الحلاوة. والأبله نجوى قالت لي:

- يا بهاء، الحلاوة لو مطلعتش دلوقتِ حالاً هتضطرّ تعمل دور البلاص!

نصيحة ١٢

الأطفال يمتازون بطاقة زيادة، الطاقة دي لازم تُخرج في نشاط؛ تمثيل، رياضة، غُنا، مسرح، كاراتيه كورة؛ أي حاجة.. إن شاء الله حتى يتعلموا الشهادة من الشهيد أحمد فلو كس.

عدم ممارسة الأطفال للأنشطة بيأثر سلبياً على نفسيّتهم، وممكن يصيبهم بما يُعرف باكتئاب الأطفال، ودا خطر جداً جداً بالمناسبة.

الحكاية (١٣) هوّ البوس اللي في الأفلام دا حقيقي؟!

كطفل صغير كان أكثر سؤال بيشغل بالي ويضجّ مضجعي،
ويحرمني النوم، هوّ البوس اللي في الأفلام حقيقي، واللّا مش
حقيقي؟ الصّراحة كنت هموت واعرف. وانا راجل أحبّ أبدأ من
راس الهرم؛ رُحت سألت ابويا، وكان بيتفرّج علي ماتش للأهلي، كان
الأهلي في أسوأ حالاته.. أيام أحمد صلاح حسني ومحمد جودة...
- يا ابويا، هوّ البوس اللي في الأفلام حقيقي؟

بصلي بصّة اللي هوّ بقولك إيه.. لو ممشتش من قدامي هطلق
أمك. وانا واد حسيس... رُحت لامّي تقريبا.. كانت سمعتني وانا
بسأل ابويا.. قالت لي بنبرة رفاعي الدسوقي «بسّ يا بابا».

طيب ما انا هموت واعرف، هوّ حقيقي واللّا بيشتغلونا! ما انا
لازم اعرف، بسّ هوّ واحد بسّ اللي بلجأ له في كلّ أسئلتي.. أنا

هسأل اخويا علاء حبيبي، عمري مهنساك، رُحتله قُلت له بصّر
يا علاء مفيش قدامي غيرك.. علاء كان زيّ حالاتي ميعرفش بسّ
ازاي يقول لي معرفش!! دا اخويا الكبير، وبينني وبينه سنتين؛ فلازم
يعرف كل حاجة.

- علاء، هوّ البوس اللي في الأفلام حقيقي واللا بجدّ!؟

علاء خدّ وضعيّة العالم ببواطن الأمور، وقال لي بصّر يا بهاء،
فيه طريقتين للبوس في الأفلام.. (شايفين التمكن! دارس وواعي
ما شاء الله عليه)

- ها.. قول، أبوس إيدك. الفضول هيموتني.

- الطّريقة الأولى يا سيدي..

... الممثل بيتجوّز البطلة ويبوسها في الفيلم، ويطلقها، وكدا يبقى
حلالّ حلالّ يا ابو صلاح (بصوت سامي سرحان في فيلم الناظر).

- هوّ كلام ظاهرّيّا مُقنع، بسّ استنى يا سيدي.. ده كدا عادل
إمام الفلوس اللي بياخذها في الأفلام بيصرفها عند المأذون!! دا في
فيلم سلام يا صاحبي.. باس كلّ اللي في الفيلم، حتّى الكينج والبلاسي
وخوليو... طيّب هوّ بقى علي ذمّته أكثر من أربعة.. دي ذمّته واسعة
قوي! لا مش مُقنعة الطّريقة دي؛ خشّ بالطريقة التانية يا جهبز.

المهمة اتصعبت، وعلاء لازم يقنعني.. فعلاء قال لي إنت عارف إن جلد الجمل زي جلد الإنسان بالظبط.. قلت له آه طبعا عارف. (ما هو مينفعش يقول لي انت عارف واقوله لأ! منظري برضه يا اخوانا) قال لي فيه بدل بتفصل للسئات من جلد الجمل، وبتلبسها وتبقى مجسمة عليها، فلما الممثل بيوسها يبقى كأنه بيوس الجمل.

- شوف رغم سطحية السبب دا.. إلا إنني اقتنعت بيه جدا (طفل ذكي ما شاء الله عليا.. غار ولا تحسد).

مسككش انا بقى واثبط، واكتفي بالتفسير العلمي المقنع اللي علاء قاهولي!! لا طبعا، رحت للأبله منى.. (حبي الأول).. أولا لأنني عاوز اتجوزها، وثانيا عشان أبهرها بالعلم الغزير. قلت لها يا أبله (بنبرة حمدي الوزير في كل أفلامه)، قالت لي نعم، قلت لها هو البوس اللي في الأفلام حقيقي؟! اللي هو يا نهار اسود يا بني.. اسأل أسئلة مفهومة. لقيت العيال بقهم اتفتح قد كدا. قالت لي هتسكت واللّا اناديلك أستاذ عز الدين؟ (عز الدين.. الله يمسيه بالخير، كان المدير، بس كان ضخم وتخيّلته بيشوطني... فخفت الصراحة.

متهدّش بقى!! راحت داخلت لنا أبله الدين.. قلت لها يا مسر، هو البوس اللي في الأفلام حلال واللّا حرام؟ (سُفت الدّخلة..

مدرسة دين بقى).. قالت لي البوس اللي في الأفلام حرام يا بهاء. ليه بقى يا أبله؟ (بقول أبله، ومس بنوع عشان متزهقش مني). قالت لي لأنه مينفعش حد يبوس واحدة مش مراته! قلت لها طيب ولو مراته؟ قالت لي يبوسها بس مش في التلفزيون؛ يبوسها في بيتهم. فطبعا بسذاجة كلب بلدي في موسم التزاوج سألت السؤال الأغبي في التاريخ.. هو انت جوزك ببوسك يا أبله؟.

الست وشها جاب ألوان، وسابت الفصل، وبلاش أقولك جوزها عمل معايا إيه!

نصيحة ١٣

علميًا، إنت زهقت من النصايح، فهنريح النصيحة دي.

الحكاية (١٤)

أيوه عارفك يا أستاذ

في الغالب، أنا لا أحبّ الميكروباص، الميكروباص يعلمك الفراق، العلاقات التي يتكوّن فيها علاقات عابرة، أنا لا أحبّ العلاقات العابرة، كلّ معرفة أحصل عليها في الميكروباص تنتهي بانتهاء الرحلة، في هذا اليوم كان الجوّ شديد البرودة، كنت أرتدي جاكيت جلد، حصلت عليه من أشهر مولات مصر، وكالة البلح. كان الجاكيت يُشعّرنى بالدفء، وكنت أخرج الدخان كأنني رجل مدخن شره:

- رمسيس يا اسطي؟

قلّتها متسائلًا متمنيًا أن يكون متّجهًا لرمسيس بالفعل، أجاب هو بهزّ رأسه، وظهر أنّ الجاكيت أعطاه شعورًا أنّني لا أحبّ الاختلاط بالناس، فأكمل هزّته:

- اطلع قدام يا سعادة الباشا.

صعدت، وكانت سيارته مرتفعة عن الأرض، فالبنطلون راح
عامل الصوت المحبب لأذني (زيسيسيسيسيق).. وكان مطالب
مني اقعد كمشان من فوق، وضامم رجلي من تحت.

ركب السواق، وبصوته الملائكي:

- الأجرة اثنين جنيه يا حضرات.. هتنزل آخر الشارع ٢ جنيه،
هتنزل نص الشارع ٢ جنيه.. هتنزل من على نافوخي ٢ جنيه..
هتنزل الانتخابات برضه ٢ جنيه، ولا يوجد استثناءات؛ لا لجيش،
ولا لشرطة، ولا لحوامل.

كان بيتكلم كأنه ممثل متمكن، هو تقريباً يقول الجملة دي
لكل الناس اللي بتركب معاه، اديته خمسة جنيه، على أساس
إني واحد وهيجيلي 3 جنيه، خد الخمسة مني وبصلي كدا
باستغراب كأني شتمته بأمه:

- لا مش معقول.. مش معقول، أنا عارفك يا عم.

يمكن يكون قرأ رواية من رواياتي، بس دول مش عليهم
صورتني، يكونش شاف اللقاء بتاعي في النايل لايف.. لا برضه
يا بهاء؛ الفيديو معلهوش غير ٣ مشاهدات: أنا والمذيعه، ورئيس
القناة اللي خصم للمعدة ٣ أيام عشان مبتعرفش تختار الضيوف.

ابتسمت ابتسامه صغيرة كدا، وهزيت رأسي لتحت مرّة، وعلى

الجنب مرّة، الليّ هو مش ممكن تفهم معنى الإشارة دي.. هوّ فهم
منها إيه معرفش، بسّ كملّ كلامه:

- والله عارفك. وشك عمري ما انساه أبدًا، دا انت بتهلّكني ضحك.

﴿ مين يا ربّي الليّ بيهلكه ضحك دا وشبّهي؟! أنا أساسًا كئيب في
كلّ رواياتي.. ومرّة عملت فيديو على الفيس عمل مشاهدات
كثير كنت بتكلّم فيه عن صيام عاشوراء.. فين يا بنيّ الليّ
بهلكك ضحك! دا انا أمي مقالتهاليش.﴾

- أنا عارفك، إنت الليّ بتطلع في مسرح مصر.

طيّب بغضّ النظر على إنه شايف مسرح مصر بيضحك.. بسّ
انا إيه علاقتي بمسرح مصر! أكونش شبه علي ربيع! لا.. أنا شعري
أنعم. أكونش شبه حمدي الميرغني! لا أنا سناني سليمة. أكونش شبه
أوس أوس! لا أنا أطول.

غُلب حماري، رُحت خابطة الابتسامة اللّزجة الليّ بتنهي أي
حوار، وقلت له:

- يلا، ربنا يوليّ من يُصلح.

اتكلّم بسرعة كأنه افتكر الليّ ناسيه:

- شُفت! افتكرتك آهو.. مش انت ويزو!

الحكاية (١٥)

كاس فلسطين ولطالما

في فيلم وثائقي بديع على قناة الجزيرة، في سلسلة أدب السّجون، عن شاعر وأديب سوريا «محمد الماغوط»، ودا راجل شاعر وأديب عظيم، يكفّيك مثلاً تعرف إنّ من أعماله المسرحية «ضيعة تشرين، شقائق النعمان، غربة، كاسك يا وطن»، وكلّها مع دريد لحام، ومن أعماله المهمّة جدّاً فيلم «الحدود» لدريد لحام ورغدة، أو فيلم «التقرير» لدريد لحام، والفيلمين عبقرين، لو مشفتش حاجة منهم حاول تشوفهم.

المهمّ.. فيلم الجزيرة، كان سنة ٢٠٠٦، قبل فترة قصيرة جدّاً من وفاته، الماغوط بيحكّي عن قصة حصلتّ معاه في لقاء شعر، وقال إنّ أحد النّقاد انتقد الماغوط إنّّه قال في قصيدة ليه «طالما»، وبعديها جاب اسم، والنّاقد قعد في الندوة يهلل بصوت عالي «طالما لا تدخل على الأسماء»، «طالما لا تدخل على الأسماء»، «طالما لا تدخل على الأسماء» السوري في وقتها.

الماغوط اتضايق، وقال للناقد:

- يعني انت سبت إسرائيل تدخل على فلسطين وانت ساكت،
والنظام يدخلني السجن وانت ساكت، والعيال مش عارفه تدخل
المدارس وانت ساكت.. ومتضايق إن «طالما» دخلت على الاسم!!
طيب إيه رأيك.. أنا هفضل ادخلها على الأسماء.. أنا مش هدخلها
غير على الأسماء.

في قصة تانية بيحكىها الأستاذ مؤمن المحمدي عن كأس
فلسطين (١)، يقول إن في السبعينيات فيه بطولة اسمها «كأس
فلسطين» شارك فيها مُنتخب مصر، وكسبها أول دورة، في ثاني
دورة سنة ١٩٧٣ كسبنا اليمن، وخسرنا من تونس وسوريا،
وخرجنا من الدور الأول.

مدرب المنتخب كان اسمه «محمد الجندي».. الصحافة المصرية
فضلت تهاجم في محمد الجندي، وشعارات ومانشيتات زي:

(١) كأس فلسطين «منافسة عربية على مستوى الدول لكرة القدم، بدأت من سنة ١٩٧٢
بمبادرة من سعيد السبع وكان يرأس المجلس الأعلى لرعاية الشباب الفلسطيني، بهدف
استحداث بطولة عربية جديدة تعيد لم الشمل العربي رياضياً.. البطولة كانت بديلة لكأس
العرب لكرة القدم، التي وقفت من الدورة الثالثة، البطولة الأولى لكأس فلسطين كانت في
بغداد وفي يناير ١٩٧٢، شارك ٨ دول عربية إضافة للعراق، وفازت مصر بالنسخة دي،
ومتعملش منها غير ٣ نسخ.

«الجندي أضع كأس فلسطين»

«وضع الكأس يا جندي»

«من لفلسطين يا جندي»

«غاب (الجندي) عن فلسطين»

فالجندي طلع بتصريح من التصريحات النارية، وقال

للصحافة.. ساعتها:

- إنتوا عايزين تحاسبوني عشان ضيّعت كأس فلسطين..

وسايبين اللي ضيّع فلسطين نفسها!..»

نصيحة ١٥

في روايتي «منزل الرجل الأعمى» شخصية محمد، شخصية من الشخصيات التي ميعجبهاش العجب، دايمًا بيقلل من أي حاجة انت عملتها.

هتقوله أنا اتصبت في الحرب، هيقولك أنا استشهدت قبل كدا، هتقوله اشتغلت ٢٣ ساعة في اليوم هيقولك أنا فضلت ١٢ سنة منامش في الشغل.. هتقوله أنا ابن مصر هيقولك إنه ضد الكسر، مهما قلت هيعلي عليك، الشخصيات دي مُتعبة جدًا، ومرهقة جدًا، ومريضة جدًا، حاول لو معاك في شغل أو حياتك، تجنب التعامل معاهم لأنها شخصيات لو حدها كفيلة تجيب لك اكتئاب.

الحكاية (١٦)

اعتماد

من أسرع الحاجات اللي التزمت فيها الصلاة، مش فاهم بعمل إيه، بس نتيجة تعلقني بأبويا، بقيت أقلده في كل حاجة، أبويا من وهو ٩ سنين، مفوتش فرض لأي ظرف، حتى لما كان بيمرض كان بيصلي مكانه.

أعتقد إن سبب من أسباب التزامي في الصلاة وأنا طفل حتى قبل ما ادخل المدرسة، كان وسيلة للتقرب من أبويا، مش حباً في الصلاة نفسها إلا أصلاً مش فاهم ماهيتها، يمكن عشان كذا الرسول قال «عودوا أولادكم الصلاة»، الموضوع بيبي عاده أكثر منه فهم.

المهم.. في بداية التزامي بالصلاة، حدّ فهمني إنك كل ما تطول وانت بتقول «أمين» ورا الإمام في الصلاة؛ كل ما الشيطان يتحرق. فبقيت أبوظ أي صلاة أشارك فيها. الشيخ يقول ولا الضالين... أفضل انا قايل «أميييييييين».. يدخل الشيخ في السورة اللي بعدها وانا مكمل ما ليش دعوة.. «أميييييييين».. ينزل الشيخ

يركع وانا مكمل «أميييييييين»،.. يخش السجود وأنا ما ليش
دعوة.. أنا راجل بخرق شياطين... «أميييييييين».. لحد ما
شيخ اتعصب، وبص وراه وقال:
- حد يسكت ابن الزنانه دا.

كبرت شوية.. خدت كريم ابن اخويا.. كان يادوب سنتين..
ولابس جلابية بيضا.. كان عسول قوي.. المهم الجامع كانوا حاطين
فيه أساتك (جمع أستك) في الأرض عشان يظبطوا الاستقامة في
الصلاة، كانوا بيحطوا أستك في كل صف إنت كمصلي بتقف عليه
عشان يبقى الصف مستقيم.

كريم جه قدام الرّاجل أثناء ركوعه وراح رافع الأستك خلاله
فوق رجل الرّاجل، الرّاجل في قمة خشوعه مفتحش عينه
أصلاً.. الرّاجل نزل يسجد وقع حتة بلنص في الأرض!!
طلعت له علامة صلاة في جبينه وفي بقة وفي رقبة وفي دقنه.

من الحاجات الغريبة إنّي مكنتش عارف بيقولوا إيه في السجود،
فركزت مع واحد ساجد جنبي، لقيته يقول «سبحان ربّي الأعلى»،
بس بيقولها بسرعة، فبتطلع منه «صو صو صو صو صو».. وبعد

كدا قال «يا ربّ اهدي مراتي اعتماد عليّا».. فبقيت كلّ ما اسجد
أقول.. «صوصو صوصو صوصو.. يا ربّ اهدي مراتي اعتماد
عليّا».. أبويا مرّة سمعني مرّة بصليّ في البيت.. قال لي:

- مين مراتك اعتماد دي يا بني!!

أصل تحيّل معايا طفل ٥ سنين بكرش.. متجوّز واحدة اسمها
اعتماد!!

يلا.. الله يرحمك يا ابويا . مات قبل ما يشوف عيالي من اعتماد.

نصيحة (١٦)

من الحاجات التي الناس بتعملها بغير وعي، لما تلاقي حدّ عنده
اكتتاب تقوله صلي، الصلاة حاجة عظيمة جدّا، وعلاقة الإنسان
بربه من أفضل الأشياء التي تقيك من الاكتتاب، لكن هي مش
الوسيلة الوحيدة، ومن الظلم إنك تخلي حدّ يكتفي بيها بسّ في
علاجه للاكتتاب.

فيه شاب اسم محمد، شغال خطيب جامع في مسجد الرحمة،
أو قول زاوية الرحمة، الشيخ محمد وهو بيخطب عن الإسراء
والمعراج.. وقف واحد من اللي بيصلّوا، اسمه أحمد، عنده ٤٢
سنة، وشغال أستاذ جامعة، بسّ منقطع عن العمل.

أحمد قال للشيخ اقرأ سورة الكرسي.. اقرأ سورة الكرسي..
الناس اتلمت عليه وقعدوه وبسّ بسّ.. وصلي على النبي يا
راجل.. مش كذا أو مال.. شوية وكررها تاني، فالناس طلّعوه
من المسجد..

الشيخ خلص خطبة، وبدأ يصلي، وفي الركعة الثانية دخل
أحمد المسجد تاني.. وقتل الإمام وهو ساجد، وكان يقول

عبارات «أنا ربكم الأعلى.. في شيطان دخل مع الإمام، في ٤٠
شيطان كانوا في المسجد».

اللي حصل طبعًا إن أحمد دا مريض نفسي، واللي حصل إن
الناس قالت له قَرَّب من ربنا يا ابو حميد وروح صلي.. فكان
الضحية شيخ الجامع.

المرض النفسي زيّ المرض العضوي.. آه علاقة الإنسان
بربه بتفرق في تحسين نفسيته، لكن مش ضمانه للوقاية من
المرض. والجُملة السخيفة على لسان طبيب نفسي.. اللي بتقول
«زراني كلّ الفئات عدا حفظة القرآن» كلام من نوعية الكلام
اللي بيوجب لايكات وبيتشير مع كابشن «اللهم أعز الإسلام،
وشتت شمل غير المسلمين... وكدا!

العلاقة بين الشخص وربّه علاقة معقدة جدًا، الحكم عليها
بالظاهر مش صحّ. يعني انا أعرف واحد مبيفوتش فرض ومع
ذلك كلّ شهر ليه علاقة مع واحدة.. أعرف واحد بيعجّ كلّ سنة
ومع ذلك مخلص نوع حرام معمלוش، ويعتمد على إن الحجّة
بتغسله من السنّة للسنّة؛ فيعيش حياته بقى طول السنّة.

الردّ على أيّ حدّ مريض نفسيًا بإنّه صلي.. دا نوع من الظلم.
مهمّ إن انتّ تصلي، ومهمّ إنك تشوف دكتور نفساني.. الطبّ
النفسي مهمّ جدًا.

«بالمناسبة» معلومة إنّ «أكثر الدول بتعاني من الانتحار هي الدول الغنية لأنها بتعيش في رفاهية»، دي معلومة مش صحيحة، واللي مطلعها قايلها عشان الناس تصبر نفسها على الفقر.

وفقاً لتقرير نشرته «CNN»، نقلاً عن «منظمة الصحة العالمية»، في شخص بينتحر كل ٤٠ ثانية، وأكثر من ٨٠٠٠٠٠٠ شخص ينتحرون سنوياً، وإنّ ٧٩٪ من حالات الانتحار في العالم في البلدان المنخفضة والمتوسطة الدخل، يعني مفيش أيّ صحّة لموضوع إنّ الدول الغنية أفرادها بتنتحر خالص.

أمي مكانتش في القاهرة؛ أمي كانت في الصعيد.. أمي رجعت من
البلد دخلت عليًا وانا نايم.. لقتني خاسس.. الدمعة فرّت من
عينها، وقالت بمنتهى الأسي:

- هي دي الأمانة يا وردة اللّي سايبها لك!

وردة بصّت في انكسار، كعسكري سايب مكان خدمته..
أمي مركزتش قوي مع ملامح وردة، وقالت: بشاميسيسيسيل
بسرعة.. يلا دهون ومحشيات بسرعة يا وردة، حرام عليك، مش
قادرة اشوف المنظر دا.

- يا أمي.. وانت قفشاني في وضع مُخِل! يا أمي أنا عاوز ابقى فتّ.
تردّ بمنتهى الأريحية اللّي في الدنيا.. طيب كل رغيف الحواوشي
دا وهبعثلك على لفت.

أمي بكلّ اللّي بتعمله في كوم، وستي في كوم تاني خالص..
خالص. ستي بتتعامل مع الموضوع على إنه عار.. يه دا «ولاد بنتي
يبقوا خاسين؟! ليه معندهومش تيتة حبيبتهم».

مرّة رُحت لسّتي وانا في ٣ ثانوي.. فشافتني خاسس، قالت لي إنت
بتهزّر! اسلقولي ٣ بيضة بسرعة. واتعاملت مع البيض كملاك في حلبة
المصارعة.. تحطّ البيضة في بقي وتدّيا بالبوكس.. وهلا هلا هاتها من
الأمعاء، والبيضة عارفه مكانها، تطلع من عندها رجليك مش شايلاك.

نصيحة (١٧)

علميًا.. الدّايت من أكثر مسببات الاكتئاب، ودا بسبب إنّ نقص النّشويات والسكريات في الجسم بتؤدي للإصابة بالاكتئاب، حتّى في نوع من علم النّفس اسمه الطبّ النفسي الغذائي، لذلك مهمّ قوي وانت بتعمل دايت تبعد عن أيّ منغصات، ولو حصل وفركشت، أو حصل عندك مشاكل؛ بلاش تعمل دايت في الفترة دي لأنّ الدّايت مع الأزمة اللّي عندك هيبقى ضغط هایل على أعصابك.

ولو قرّرت تكمل في الدايت يبقى تعتمد على نظام غذائي سليم، مفيش فيه نقص في العناصر الغذائية الأساسية، ودا عمله مع دكتور.

الحكاية (١٨)

الديك حارس المقبرة

كنت صغير، ٥ أو ٦ سنين كدا. أبويا حكالي قصة أسطورية غير مقنعة وغير مصدّقة، بسّ لأنها من أبويا أنا صدّقتها. القصة بتدور عن واحد طالع على شُغله بدري قوي مع الفجر، فالرّاجل كان بيتّاب.. ما هو لسّه صاحي بقى.. لقي ديك، استغرب إيه اللي مصحّي الديك دا بدري؟! طبعا الرّاجل محطّش في دماغه إنه ديك وبيأذن للفجر. ومش عارف إيه وجه الاستغراب في الديك! بسّ قشطة يعني، الرّاجل جاب طوبة (زلطة - حجر - طوبة) وضرب الديك.. الديك كان حارس مقبرة فرعونية، وبمجرد ما جات الطوبة فيه مات (ديك رقيق) الديك.

مات من هنا، وانفتحت مقبرة فرعونية مليانة ذهب، الرّاجل بسرعة جاب عياله وحاوطوا بالطوب على مكان المقبرة، وبقوا أغنيا جدّا، طبعا بغضّ النظر عن لا عقلانية القصة، وإنّ مفياش

عنصر ماسك نفسه، ولكن أنا كطفل ذكي قرّرت قرار كنت أرجو
ألا يعينوني عليه، قلت لنفسي:

- ليه معملش كدا يعني؟ هل في نقص في الديوك؟ هل
في نقص في الطوب؟ بالعكس الديوك كثير والطوب أكثر.
وفضلت كل يوم وانا رايح المدرسة.. إيه دا ديك؟ إنت كلبة..
اخرسي مقبرة.. دبّ في راس أمه. تقريبا خسائر الديوك في
الفترة دي كانت أكثر من أنفلونزا الطيور.. كنت بنام بحلم
من المقبرة. وأصحي أفتح راس الديوك. الثروة الداجنة في
مصر اتأثرت بتلات حاجات: مقاطعات السادات للحوم
سبعينيات القرن الماضي، وأنفلونزا الطيور ٢٠٠٩، وزلطة بهاء
حجازي ٢٠٠٣.

في فيلم اسمه «محاكمة علي بابا» عن قصة للكاتب الساخر
أحمد رجب، وسيناريو وحوار عاطف بشاي، إخراج إبراهيم
الشقنقيري، كان يبحكي قصة طفل في المدرسة أبوه بيعلمه مفردات
الأمانة والخير، بيدرس في الحضانة، قصة علي بابا والأربعين
حرامي، والقصة بتفضل شاغله باله، ومش قادر يصدق إن
شخصية «علي بابا» بطل، ويريد أن يحاكمه على جرائمه، والحقيقة

أنا برضه مش فاهم ليه بندرس القصة دي لأولادنا؟ إيه العبرة اللي
ممكن تستفيدها من قصة علي بابا، علي بابا نفسه سرق الحرامية، هل
مثلاً سرقة الحرامية صفة محببة؟

من فترة كان في إعلان لأحمد حلمي، في التقرير العالمي للتنمية
المبكرة للأطفال، وشارك حلمي بالإعلان في فكرة التنمية
المبكرة للأطفال عن طريق استخدام الأسماء الحقيقية للأشياء،
اللي هو احنا ليه بنقول للطفل دا «كزكو» ما نقوله فراخ، ليه
بنقوله «كخ» ما نقوله عيب وحرام.

نصيحة (١٨)

حاول لما تيجي تنقل خبرة لطفل أنقله الحاجة الصحّ، واللي هتعيش معاه طول العمر، يعني أعتقد إن كان ممكن حاجة تتغير فيا لو أبويا قال لي قصّة تانية غير قصّة الديك، وطفل «علي بابا» حياته هتتغير لو درس شخصية فيها صفات متوافقة مع القيم اللي بيدرسها، طيب هو إيه علاقة دا بالاكتاب؟! مالوش علاقة، بس انت لو مريّتش كويس، هيجيلك اكتاب وشلل ومرض، وكل حاجة وحشة في الدنيا.

كمان فيه نقطة مهمّة قوي، إنت لما بتشتري غسّالة أطباق بتبصّ في الكتالوج عشان متبوظش.. فتخيل انت بتربي أطفال من غير ما تقرا كتاب واحد عن التربية، وتستغرب لما تلاقي زومبي في الشارع.

الحكاية (١٩)

مصطفى كامل

الحقيقة، مصطفى كامل دا سبب اللّي انا فيه، لؤلّاه يمكن مكنتش انا في اللّي وصلت له، مش عارف هو إيه اللّي وصلت له، بسّ الراجل دا ليه فضل في حياتي، والله بجدّ مش هزار.

لما كنت في ثانوية عامة، أهلي قرّروا إنهم يخلّوني في أوضة منفصلة، طبعًا مع وجود ٩ أخوات دي رفاهية بنت ستين كلب، أي نعم كانت مرات اخويا بتربّي فراخ في نفس الأوضة، وكان في ديك بالليل بيخلّص الفراخ، وييجي ينام جنبي يا بيه.. بسّ برضه قشطة.

في الفترة دي كشاب بيكتشف الحياة جديد، كان لازم اتأثر بالأغاني وبالغنا، أخويا شريف كان في ليبيا، وبعث تسجيل اسودّ بيايين، باب منهم كنت بحوّش فيه فلوس، والثاني كان في شريط واحد بسّ مبيتغيرش.. شريط «أجمل سنين العمر»، الحقيقة بدون

مبالغة شعبية مصطفى كامل في الصعيد طاغية في الفترة دي، كانت طوابير على محلات الكاسيت عشان تشتري النسخة المضروبة من شريطه، هنا خليني أنوّه إن مصطفى كامل نفسه اللي كان بينزل النسخة المضروبة، كان اسمها طبعة شعبية.

أنا كشابّ عاوز اتفائل لازم اسمع أجمل سنين العمر، رُحت للرجال بتاع الشريط، كان عند الموقف.. عاوز ألبوم أجمل سنين العمر.. قال لي الأستاذ مصطفى كامل تقول عليه شريط!! ألبوم للناس الثانية.. ادهولي بنبرة عمرو عبد الجليل في دكان شحاة «خد بسّ يا كش تحسّ الوجة اللي فيه».

رُحت البيت وقررت إنّي أشغل الألبوم، وعينك ما تشوف إلا النور.. بصّ يا سيدي.. كتاب الكيمياء قدامي.. بذاكر الكيمياء العضوية. وإذا بطائر السنونو الحزين مصطفى كامل يشدو.. أجمل سنين العمر، أنا انبسطت بقي..

بتجري ويا ناس خاينة

ضماير سودا مش باينة

ليالي قلبنا الطيب يداوي الجرح، ويطيب، وفاكر إنه عرف يختار... الأغنية دي كفيلة تخليك تقطع شرايين.. طلعت الشريط، وبالقلم جريت الشريط شوية.. أغنية أنا آسف.

دي بقى هتقطع شريان الإيد الثانية عشان لو فشلت في الأولى.

أنا آسف

ولا هرجع، ولا هضعف، ولا هقبل

دا انا رافض ماضيّه معاك

طب ازاي هقبل مستقبل.

ألبوم كانت الأغنية الفرائحة فيه اسمها آديني عايش، اللي هو
رضا.. بنقضي أيامنا يا بني.

الحالة اللي وصلنا ليها مصطفى كامل مع الديك اللي بينام
جنبي.. خلّتي اذاكر كثير، لا.. كثير إيه! أنا مكنتش بعمل حاجة
غير اني اذاكر.. لما احس اني ضعفت.. اشغل السنونو الحزين
دقيقتين من اغنية انا آسف.. بيدوني بتاع ٧ ساعات مذاكرة.

حالة التكد اللي عيشهالي مصطفى كامل كانت هي الدافع إنّي
ابقى أحسن.

فشكرًا لمجرم الأغنية الشعبية.. الرّاجل اللي لما سألوه نفسك
في إيه؟ قال لهم نفسي أقتل اليوتيوب. يا لهوي على إجرامك يا ابو
فتحي.. فتحي دا اسم ابنه.. تخيل يبقى مطربك المفضل اسمه أبو
فتحي!

نصيحة (١٩)

من الحاجات اللي ممكن متاخدش بالك منها، إن اللي هتقوم بيه مهما كان صغره بيأثر على نفسيتك.. كلمة إنت فاشل اللي بتقولها دي بتأثر على نفسيّتك، وعلى ثقتك بنفسك، الأغنية الحزينة اللي بتسمعا بتخليك تعيش «مود» حزين، برضه بيأثر على نفسيّتك.

فركّز قوي في الناس اللي بتجالسهم، اللي بتقوله على نفسك، اللي بتسمعه، الإنسان في النهاية، نتاج خبراته، الخبرات اللي في الآخر بتكوّن من كلّ اللي فات، فمتجيش انت توصف ابنك وتقوله يا فاشل ومُنْتَظَر مَنّه حاجة غير كدا، حتى لو بتقوله بدافع إنك تستفزّه، فيه مليون طريقة تطلع من الشخص أحسن ما عنده، غير إنك توصفه بوصف سيء.

الحكاية (٢٠)

إشاعات... إشاعات.. نقول لسه

في التسعينات والألفيات، ظهورا شوية إشاعات يموتوا من الضحك، خليني اراجعهم معاك لأنني متأكد إنك لمست في حاجة منهم.

- فيفي عبده، الراقصة الشهيرة، في فترة الثمانينيات والتسعينيات، معاها عربية بتطلع بيها جوا الأسانسير، وإنها لو وقفت على فلوسها هتبقى أعلى من الهرم.. طيب هاتي أي حاجة يا مدام فيفي، الحقيقة سألت فيفي عبده عن المعلومة دي، كل اللي قالتهولي كلمة واحدة «سكوزمي»، وضحكت ضحكة وصلت صداها للبابا في روما، وكل الخطابين في الجبال النائبة، والفلاحين في مزارعهم، والعجائز حول نار المدفأة في ليالي الشتاء الباردة.

- الفنان الجميل بهاء سلطان اكتشفوا إنه جاسوس إسرائيلي، والسلطات المصرية قرروا إنهم هيعدموه بعد ألبوم ٣ دقائق.. الألبوم نزل وكسر الدنيا، كسر الدنيا حرفيًا عشان الإشاعة الهبلة دي.. ويقال إن صاحب الإشاعة هو نصر محروس منتج الألبوم.

بسّ انا عاوزك تتخيّل معايا، خلاص السّلطات المصرية اكتشفوا
إنّه جاسوس، بسّ الدولة بطيبة قلبها مستّياه يخلّص الألبوم عشان
تعدّمه.. أخلاق يا بلادنا والله.. لدرجة إني كواحد من الملايين
البسطاء، وواحد من العجائز حول نار المدفأة رُحت اشتري
شريط ٣ دقائق كان بتلاتة جنيه حوّشتهم من مصروفي، وأصلاً
مكانش عندنا تسجيل، بسّ نفسي أسمع الجاسوس دا إيه اللي
قايله في «٣ دقائق»، فلقيت الرّاجل في محلّ الكاسيت بيقولّي عاوز
تسمع الجاسوس ليه يا بني، دا انت صغير، طبعاً معروف إنّ كلام
الجواسيس كلام كبار.

- عادل إمام، قعد مع الرئيس الأسبق حسني مبارك، وطلب
من الرئيس إنّه يسدّد ديون مصر بالكامل بشرط يحطّوا صورة عادل
إمام على الجنيه المصري الجميل.. ومبارك باستماتة رفض الطلب
رفضاً قاطعاً، وقال لعادل إمام:

- لا يمكن أحطّ صورتك، أنا هحطّ صورة فيفي عبده..
وطبعاً دا عشان ياخذ هوّ العربية بتاعتها، ويطلع بيها الأسانسير.
عُقر مبارك دا.

- اللبنانية نانسي عجرم، ومع نجاح أغنيّتها الشهيرة «آه
ونص»، كانت مع محمود سعد في برنامج الشهر «البيت بيتك»

(أول توك شو في مصر)، وقالت «أنا معايا كليين؛ كلب اسمه محمد وكلبة اسمها عائشة»، وإن محمود سعد غضب منها، وقام ضربها بالطرايبزة، الشائعة دي انتشرت بطريقة بشعة.. لدرجة إنني أنا حكيتهما على أساس إنني شفت الحلقة، ولما محمود سعد نفى الموضوع في إحدى الحلقات وقال إن دا محصلش.. أنا قلت إن إسرائيل ضغطت على محمود سعد عشان ينفي الحلقة، وإن مبارك تدخل حفاظًا على العلاقات المصرية اللبنانية، وفعلاً قرّرت إنني أقاطع كل أغاني نانسي عجرم.

من الإشاعات اللي بتلاقي رواج بشكل كبير في مصر، إشاعات المواد الغذائية، ودي بيطلقها اتنين؛ المشايخ والأمهات، يعني مثلاً هتلاقي إشاعة بتقول إن كلمة كوكاكولا لو حطيتها قدام المراية هتبقى لا محمد لا مكة.. يا سلام على دماغك الأماظ يا برنس! مع إنك لو عملت سيرش بسيط إن شاء الله على ويكيبيديا حتى هتلاقي إن كلمة كوكاكولا جات لما صيدلي أمريكي اسمه جون ستيث بمبرتون»، قدر في صيدليته اللي اسمها «جاكوبس» إنه يركب منتج بديل للكحول، بإنه ضاف ثاني أكسيد الكربون إلى المياه مع محليات (سكر أو أسبارتام) ومادة «الكوك»، وسماها كوك عشان مستخرجة من ورق الكوكايين، وضاف للمخلوط نكهة «الكولا» المشتقة من بذور نبتة الكولا اللي فيها مادة الكافيين.

وكان يبيع المنتج كدوا للحموضة، واسمه «نافورة شراب الصّودا»، ولما اتطرح تجاريًا سمّوه كوكا كولا.. ودا كان سنة ١٨٨٦.

لكنّ أنا هفترض مع صاحب المعلومة الجملية دي إن كوكا كولا معناها لا محمد لا مكة، وإن حرف الّتي قدام المراية يعني لا، وإن كلمة محمد مفياش دال.. طيب كلمة بيبي كولا معناها إيه، كلمة فانتا معناها إيه، إزاي الناس دي يبقوا بالعبط دا.

وهتلاقي كمان شركة بيبي خدت نصيها، فتلاقي إشاعة مشهورة جدًا إن كلمة بيبي، هي اختصار لجملة إنجليزية، كلّ كلمة منها بتبدأ بحرف من حروف بيبي، الجملة هي «Pay every penny، save Israel»، يعني ادفع كلّ بنس لتنقذ إسرائيل، مع أنك برضه لو عملت نفس السيرش هتعرف إن بيبي جايه من إنزيم البيسين الّلي يساعد على، لأن بيبي كانت بتستخدم الإنزيم دا في البداية وإن بداية بيبي في الأساس بداية طبيّة كمساعد في الهضم، وإن بيبي بدأت سنة ١٨٩٣، وساعتها مكانش في أي كلام عن دولة إسرائيل أصلًا، وبداية إسرائيل بدأت بوعد بلفور وزير الخارجية البريطاني بوطن قومي لليهود سنة ١٩١٧.

وهتلاقي إشاعة تالّثة أنا واثق إن الّلي مطلعها أمّ حدّ فينا، وهي إن الإندومي بيحب سرطان، والحقيقة إن مفيش أيّ تقرير

طبي أو علمي صادر عن برنامج الشيف حسن حتى يقول كدا،
وهتلاقي الإشاعة دي لما فشلت، طلعتوا بنص الإشاعة الثاني،
السمنة بتاعت الإندومي معمولة من جهين الخنزير، وطبعًا
شركة أندومي نفت بكل الطرق اللي في العالم، بس انت تعرف
أكثر من أمك.

- الفنان صلاح قابيل اندفن حي، وصحي في قبره وقعد يخبّط
ويخرّبش في باب القبر، ولما فتحوا المقبرة لقوه مات.. آهي القصة
دي مستحيل تلاقي واحد مش عارفها، مع إن عمرو ابن صلاح
قابيل نفاها. ومفيش أي دليل عليها، بس هو اندفن حيّ إيش
عرّفك انت؟!!

- محمد صبحي مسيحي، أصل أمه مكانش بيعيش لها ولاد
صبيان، فقالت هسميه محمد عشان يعيش.. وبعدها أمه أسلمت..
الهبل إن محمد صبحي أصلًا اسمه الكامل.. محمد محمود محمد
صبحي.

- لو اتصلت برقم ٧٧٧٧٧٧٧ هيرد عليك الشيطان. أنا مرّة
اتصلت بالرقم دا حقيقي، كنت مستني الشيطان يرد عليّ، السؤال
أنا كنت بكلم الشيطان ليه أصلًا!

تقريبا في قد الي أنا كتبه ٣٠٠ مرة، ودا لأن ببساطة الإشاعة مش هتلاقي وسط تنتشر فيه أكثر من عندنا في مصر، شعب ثقافته سمعية، مبيجتهدش أنه يدور على أي حاجة، كمان شعب بتسيطر عليه الأمية وأكثر من كدا أن حتى الفئة المتعلمة كثير منها مش متعلم كويس، ودا طبعا لأن التعليم قايم على التلقين ومبينميش مهارات البحث ولا مهارات التعلم الحديثة.

نصيحة (٢٠)

بنسبة كبيرة.. وكبيرة جدًّا، الإشاعات دي بتكون سبب في نشر جوّ من الكآبة في العمل، الشركة هتفلس وهتقفّل، دا أصلًا كفيل بإنك متنامش وانت بتدور على بديل لشغلك في الشركة اللي أريدي مفيش أيّ دليل إنها هتقفّل، سقف فصل حمادة في تالته رابع بيسرّب شعر الفنانة أنتصار، الإشاعة دي تعمل قلق في جروب «الماميز» على واتساب، والحقيقة إنك ممكن ببساطة شديدة، تعمل سيرش على أيّ معلومة وهتعرف ببساطة هيّ حقيقية والّا لا، بدل ما تكون سبب في بثّ طاقة سلبية، ومصدر للطاقة السلبية.

الحكاية (٢١) منزل الرجل الأعمى

رواية «منزل الرجل الأعمى» هي الرواية الرابعة في تاريخي، الرواية ليها أهمية خاصة في مسيرتي، ومن أصعب الروايات اللي كتبتها، طبعًا أكيد انت عارف إن فيه ناس بتشتري رواية وتقوم تطبعها وتبيعتها بسعر أقل، أو المعروف بالرواية المضروبة.

فالرواية بتاعتي منزل الرجل الأعمى انضربت، ولقيتها في أكثر من مكان بتتباع على الأرصفة. في العادة مبحبش اتكلم مع اللي بيعوها عشان مسببش ليهم إحراج. في مرة قررت أتكلم مع حد منهم، أنت عارف إن الرواية تنضرب مش مشكلة قوي يعني للكاتب لأنها بتعمله انتشار أكثر، يمكن هي مشكلة للناس، وللصناعة ككل؛ لأنها بتدمر الصناعة. المشكلة الأكبر إن الرواية بتتباع في المكتبات كنسخة أصلية بـ ٤٥ جنيه، وبتتباع الرصيف كنسخة مضروبة بـ ٦٠، وبرضه مش دي المشكلة.

في منطقة الإسعاف في وسط البلد، قررت إنني أنكش بياع من البياعين.. فوقفت قدام الفرشة، ولقيت روايتي منورة، وأجريت

حوار صغير مع البياح، ورسمت على وشي فكرة إنني معرفش حاجة عنها، وإنني اتشدت ليها عشان اسمها.

- حلوة الرواية دي.

بص بصة سريعة على الرواية، وقال لي:

- رعب موت، بطلها راجل أعمى بيتحوّل في الليل لزومبي.

حسسته إنني مهتمّ ومُنبره:

- في أحد مشاهد الرواية بياكل مراته..

أبدت إنني مَبهور باللي بيقله أكثر، وهزيت راسي أكثر من مرّة، وقلبت الرواية مرّتين في أيدي، وقلت له:

- إنت قريتها يا صديقي؟

قال لي:

- قريتها مرّتين يا عمّ، رواية بديعة.

بغضّ النظر عن إنّ الرواية لا فيها زومبي ولا فيها رُعب أصلاً.. ويمكن الخلط حصل عنده بسبب فيلم «Don't Breath».. بس فرحت، وقلت له:

- المؤلف بتاعها ليه روايات تانية؟

بصّ على الكتاب بصّة سريعة، ولقط اسمي:

- أستاذ بهاء حجازي دا عبقري يا أستاذ. معنديش ليه روايات
تانية، بسّ هوّ عبقري، بقولك قريرتهم مرتين.

قلت له وكأنّ الفضول هياكلني:

- تعرفه انتّ على كدا؟

قال لي:

- آه، بيعدي يقعد معايا ساعات، عسول قوي، وطيب
قوي، وابن ناس قوي. هوّ مش بتاع رعب بسّ دمه خفيف قوي.
(المفروض يعني كُتاب الرعب بيبقوا أشرار وكده)..

- أنا شفته مرّة في التلفزيون، هوّ أقرع شوية من قدام.

قال لي:

- آه أقرع كدا، وجسمه قليل.. بسّ الرواية عسل، عسل، عسل.
قلت له: تمام. مدّيت إيدي أسلم عليه، فسلم عليّا، قلت له:
- أعرفك بيّا.. أنا بهاء حجازي.

وبسرعة البديهة اللي في الدنيا، قال لي:

- ما شاء الله عليك! شعرك كبر أهو يا أستاذ، وجسمك كبر كمان!

نصيحة (٢١)

مش كل الناس هتقولك الحقيقة، فيه اللي هيقولك غير الحقيقة
عشان جاهل، وفيه اللي هيقول غير الحقيقة عشان مبيحبكش،
وفيه اللي هيقولك غير الحقيقة لأنه فتاي، ومش هيقول مبيعرفش،
فحاول لما تاخذ أي معلومة من أي حدّ (من أي حد).. إنك تتأكد.

ربنا يقول في سورة الحجرات: آية ٦: (يَا أَيُّهَا الَّذِينَ
آمَنُوا إِنْ جَاءَكُمْ فَاسِقٌ بِنَبَأٍ فَتَبَيَّنُوا أَنْ تُصِيبُوا قَوْمًا بِجَهَالَةٍ فَتُصْبِحُوا
عَلَىٰ مَا فَعَلْتُمْ نَادِمِينَ).. جزء من دينك إنك تتأكد، مش إنك تنقل
أي معلومة بدون إنك تتأكد، تخيل معلومة واحدة ممكن تغير
حياتك، وممكن تكذبك تمامًا.. فخلي بالك.

الحكاية (٢٢)

حمادة

في سنة ٢٠٠٩، أنا كنت ١٠١ ٪ ثانوية عامة، وداخل على الدنيا بحبّ وحماس، كنت عاوز ادخل كلية حقوق، أعمامي قالولي لأ.. أنت تدخل كلية شرطة، وقد كان.. قدّمت في كلية الشرطة، طبعا عشان ابقى مواطن شريف، وبالفعل قدّمت في الكلية اللي كان اسمها «أكاديمية مبارك للأمن».

وعشان ذاكرتي قويّة، لسه فاكر لحدّ دلوقتٍ، وهفضل فاكر طول عمري، وطول ما انا عايش، الأسئلة اللي جات في امتحان السمات (القدرات)، وأتحدّى حدّ من حضراتكم يجاوب على الأسئلة، وهي :

- ما هو متوسط عُمر الفيل؟ وطبعًا.. دا على أساس إنها أكاديمية مبارك للطب البيطري.. مش عارف ليه ساعتها كتبت إنّ متوسط عُمر الفيل ٤٥ سنة، يعني إيه اللي أغراني في الرّقم دا، وعشان لو حدّ وقفك في لجنة وقالك متوسط عُمر الفيل، فالفيل الآسيوي بيعيش ٤٨ سنة، والفيل الأفريقي من ٦٠ - ٧٠ سنة.

- السّؤال التّاني: اذكّر عدد أسنان الزّرافة. هات لي زرافة يا سيادة اللّوا وانا أعدّدك أسنانها. طبعًا هوّ ازاي أخليّك ظابط وانّت مش عارف عدد أسنان الزّرافة، ويعني عشان تبقى عارف يعني؛ فعدد أسنان الزّرافة أقسملك بالله أنا لغاية دلوقتٍ ما عارف.

- السّؤال التّالت: ما معن كلمة قراقوش؟ وأنا ك جَهَبْذ يعني، قلت بسّ همّا بيختبروا صراحتي، هل هقول واللاهخاف، فكتبت في إجابة السّؤال دا.. كلمة قراقوش: تعني رئيس ظالم زيّ الرئيس مبارك.. يا سلام سلّم على مخك البلا لنت.. يا بحر العلم.. يا ترعة المفهوميّة.. يا فيلسوف الحمير.

وطبعًا بعد المخمضة دي فأكيد النتيجة معروفة.. وربّنا عشان بيحبّ البلد دي (مصر)، فحرّمها من أوّل ضابط بكرش، وعنده تسلّخات حوالي ٦ شهور في السنة، وفشلت في الموضوع، ودخلت كلية إعلام.

من أوّل الناس اللي عرفتهم في كلية إعلام، كان صديقي حمادة، وحمادة لمن لا يعرفه واحد من أجده الناس اللي ممكن تقابلهم في حياتك.. بسّ هوّ عنده شويّة مشاكل مع كلّ حاجة في البلد. سكنت في المدينة الجامعيّة، وفي يوم لقيت حمادة بيقول لي:

- إحنا هنقعد في إعلام كدا محلّك سرّ! إحنا لازم نشتغل في الصحافة.

واخنا الحقيقة، مكذبناش خبر، طلعا علي جرنان الدستور اللي كان جنب السفارة السعودية، ودخلنا بكل تناكة على السكرتارية وقولناها «الأستاذ إبراهيم موجود»، فالسكرتيرة قالت لنا «نقول له مين يا شباب»، راح حمادة متخذ وضعيّة العالم بيواطن الأمور، وقال لها: - قوليله بس.. حمادة عبد الوهاب، وبهاء حجازي. قال يعني، إبراهيم عيسى أول ما يسمع الاسم هيهب واقفًا من ثباته.. المهم السكرتيرة مسكينة مفهمتش حاجة، فقالت لنا «أنا هحدّد لكم ميعاد يوم التلات اللي جاي»، وأنا وحمادة سبنا أرقام تليفوناتنا، قالت لي الميعاد إمتى، يوم التلات، برافو عليك، بفضل الله يعني.. وببركة الدعا والسجدة، وعشان وشنا الحلو «يوم الاتنين» تقريبًا حدثت أزمة الدستور الشهيرة والجرنان اتقفل.. فدانا يا أستاذ إبراهيم. هل أنا وحمادة أحببنا؟ لا.. أبسلوتلي.. قلنا عادي، واوعى تياس، والياس خيانة، والزمالك قادم، وكل الحاجات الحلوة دي. حمادة ميسكُتش بقي ويتهدّ، ويخلي الناس تأكل عيش.. لا أبدًا.. قالي وانا جاي من الفيوم يا بهاء اتعرّفتلك على مُخرج في قناة الناس، وهنروحله نشغل في الإعداد.. بس يا سيدي فرحت قوي، وسمعت خُطب الشيخ محمد حسان كلها، وعيّطت، واتشخّفت، وشويّة بشويّة كنت هألف كتاب عن حُكم ركوب المرأة المترو في الصيف. اتصلنا بالراجل، وادّالنا ميعاد يوم الخميس.. يوم الأربع صدر

قرار من أنس الفقي «وزير الإعلام حينها» بإغلاق كافة القنوات الدينية... حمادة يا جماعة.

المهم.. حمادة حسّ إن القاهرة مش مصالحة على نفسه.. فقال أنا هسافر الفيوم بقى.. وفعلاً سافر الفيوم، وهو مروّح بيتهم ركب ميكروباص فيه ١٥ شخص.. تخيل يا مؤمن العربية اتقلبت! وفي ناس ماتت.. والوحيد اللي طلع سليم من الحادثة دي هو حمادة!

نصيحة (٢٢)

هل في حاجة اسمها نحس! فيه ناس كتير للأسف بتعتقد في فكرة النّحس، بدياية مفيش حاجة اسمها النّحس خالص، خالص. إغلاق الدّستور سبب مناطحة إبراهيم عيسى في مبارك، ومالوش علاقة لا بيّا ولا بحمادة، إغلاق القنوات الدّينية دي سياسة دول، وليه علاقة بأنّ الدولة كانت بتسيطر على كلّ حاجة، وتقدر تقفل وتفتح.

وحادثة العربيّة سببه السّواق، هوّ يعني حمادة كان بيسوق، لو انتّ شايف إنك نحس، أو حدّ أقنعتك إنك نحس وحظك وحش، فالأول اسمع ربّنا بيقول: (إِنَّ الَّذِينَ آمَنُوا وَعَمِلُوا الصَّالِحَاتِ إِنَّا لَا نُضِيعُ أَجْرَ مَنْ أَحْسَنَ عَمَلًا)، وبيقول: (وَإِنَّمَا تُوفُونَ أَجُورَكُمْ يَوْمَ الْقِيَامَةِ)، فلو انتّ شايف إنك نحس فرّبنا بيقولك إنه مبيضيّعش أجر اللي بيحسن عمله، فببساطة شديدة أنتّ اللي عليك إنك تحسن عملك بس.

أنصحك: شوف مسلسل «برج الحظّ»، من بطولة محمد عوض وصفاء أبو السعود، من تأليف لينين الرملي، وإخراج يحيى العلمي.

الحكاية (٢٣)

بنطلون فرح أسامة

أنا لحدّ سنة ٢٠١٢ تقريبًا مكنتش لبست بدلة في حياتي، ودا لسبب غريب الحقيقة، أنا مقاس رجلي كبير جدًا، وصعب جدًا الاقي جزمة، فبالتالي لا يمكن ألبس بدلة على كوتشي، فعشان كدا ملبسش جزم، وبالتالي ملبسش بدل.

في فرح أسامة، ابن عمّي، في سنة ٢٠١٢، الشّباب قرّروا إننا كلنا هنروح الفرّح بيّدل، وأنا مش هبقى الغليس اللي وسطهم واروح من غير بدلة، لكنّ قبل ما نشترى بدلة لازم نشترى إيه.. برافو عليك؛ جزمة.

١٣ محلّ يا مؤمن، مفيش جزمة في الـ ١٣ محلّ دخلوا في رجلي، جرّبنا كلّ الطّرق؛ اللي يقولك ألبسها بالكيس، وهي هتوسّع معاك، يا بني هيّ مش داخلة في رجلي أصلًا! إزاي هشتريها، يقوليّ جرّب بس، ولو مريّحتش معاك بعد ٣ شهور ابقى قابلني، لقيت جزمة ودخلت في رجلي، فرحت قوي.. قوي.. قوي، عارف أنت اللي يقولك فرحة عمري جواز ابني،

واللي يقولك فرحة عمري يوم الثانوية العامة؛ لكن أنا فرحة عمري يوم ما الجزمة دخلت في رجلي، كام يا عمّ الجزمة دي؟ قالّي ١٠٩ جنيه، ومش عارف ليه ١٠٩ مش ١١٠، أو ١٠٠ مثلاً، المهمّ تمام، اتفضل ١٠٩ أهمّ، وقبل ما أمشي قرّرت أقيس الفردة الثانية، لقيت فردة ٤٧ وفردة ٤٢، أنت متخيّل يعني كنت هدخل الفرحة برجل ونص، كنت هبقى مسخرة، ورغم إنّي مشتريتش الجزمة؛ برضه كنت مسخرة.

المهمّ ربنا أراد، ولقيت جزمة، كانت ضيقة جداً، ضيقة جداً اللي هي بتعمل «فقاعة» كدا في رجلك، مرضتتش أشتري البدلة فأجرتها، إيجار البدلة ليوم واحد كان ١٠٠ جنيه، وتمنها كان ١٥٠، ودي الحسبة اللي مش قادر أفهمها أصلاً، وطبعاً بالسعر دا أكيد أنت عارف إن الصّح إنك تشتريها؛ برافو عليك، أنا أجرتها.

يوم الفرحة قرّرنا نتجمّع بدري، لبست البدلة بدري، وقلت أروح أجيب علبة مناديل، وحابب أقولك إنّي اتزفيت من العيال في الشارع «العريس أهو»، وكان في عيّل صغير «بيتفتف» هرّاني «البنطلون بقى كله تفاقة».

المهمّ يا سيدي، كلّ العيلة راحت الفرحة بالميكروباصات إلا أنا، ركبت مع أعمامي العربية الملاكي، كانت عربيّة واطية،

البنطلون كان طيق، يادوب بوطني عشان أركب العربية، البنطلون
عمل الصوت اللي بتحبّه «زيبيق».. طبعًا فتحة البنطلون كانت
وسّع من قناة السويس الجديدة.

دخلت الفرحة، تحسّ إني صاحب العريس، وبيكي على
السنين اللي فاتت، العريس حازر القاعة من الساعة ٧
للساعة ٩، العريس أصلًا وصل القاعة الساعة ١٠، تخيل
بقي الثورة اللي كان فيها صاحب القاعة، الرّاجل بتاع القاعة
كان حرفيًا مش شايف قدامه، كمان نصّ ساعة جايله فرح
تاني! والعريس أصلًا لسه مجابش العروسة من الكوافير،
الرّاجل لقاني قاعد على جنب ومكسوف، قاللي «أنت شكلك
اللي بتفهم فيهم، ينفع كدا؟!»، قلت له أنا هقولك الحقيقة..
قاللي اتفضّل يا أستاذ (كان ألدغ في السّين).. قتلته عاوز إبرة
وخيطة.. إلهي يشترك.

يمكن الإقية في الموضوع، مش في البدلة، قدّ ما في الجزمة
نفسها، روجت البيت وكنت ساكن في الدور الأرضي، الشارع
كان مليون طين، فالجزمة أصلًا ثقيلة، ولّمت طين، بقيت زيّ محمود
المليجي في فيلم الأرض، بيشدوني عشان امشي بالجزمة، ووصلت
البيت، خلعت الجزمة ودخلت انام، صحيت الصبح، مش

قادر من الألم، فتحت باب الشقة، لقيت الكلب وكأنه مستني..
صحاني، خذ فردة الجزمة في بقه، وانطلق، أنا مش قادر أجري،
أجري يا هيثم، يلا يا هيثم وراه، ولغاية دلوقت لا شفت الكلب
ولا الجزمة، وفاضل معايا فردة جزمة مقاس ٤٨، فاللي محتاجها،
من عيني.

نصيحة (٢٣)

هناك ما يُعرف باكتئاب المناسبات السعيدة، فلو أنتِ زيّ حالاتي
بتحسّ بتوتر في الأفراح، ومبتقاش مبسوط وانتِ في الأفراح فأنتِ
طبيعي؛ لأنّ في ناس مرّضى أو مُصابين بـ «شيروفوبيا»، أو الخوف
من السّعادة.

وفي الغالب، سبب الشيروفوبيا، هو إنك مرّيت بصدمة
عاطفية، ولازم تخضع لجلسات علاج نفسي، اسمها جلسات
العلاج من الشيروفوبيا.

الحكاية (٢٤)

المسمار

عارف أنت المثل اللي بيقول «الفقري يعضه الكلب في القطر»،
اللي هو إيه اللي ركب الكلب القطر يا سيدي! قالك ما هو فقري
بقى. طيب عارف المثل اللي يقولك «قليل البخت يلاقي العضمة
في الكرشة»، بالمناسبة علمياً الكرشة مفيهاش أي عضم، لكن لأنه
قليل البخت هتطلع الكرشة، أهو الفقري وقليل البخت دول
مش ناس، دول أنا.

أنا بعترف وفخور إن أبويا راجل على قد حاله، قدر بمرتبته
الحكومي (800 جنيه) إنه يربينا أنا و 8 إخوات من غير ما
يستلف جنيه من حد، ومن غير ما يحوجنا لحد. المهم، كنت
لسه في أولى إعدادي، عارف مشهد «وش إجرام» باشا باشا
باشا باشا باشا باشا باشا باشا.. أنا كنت زيّه، بس كنت بقول
جملة من كلمتين لأبويا 24 ساعة في اليوم...

«عايز شنطة عايز شنطة عايز شنطة عايز شنطة عايز شنطة عايز
شنطة عايز شنطة»، الراجل رغم أن ظروفه صعبة، وإن فلوس

الشنطة دي ممكن ميكونش معاه، فضل مستني ليوم القبض، وأول حاجة عملها قالي: بهاء، مقلتش نعم، قلت «عايز شنطة».

المهم قلت ١٥ جنيه، وتخيل إداني ١٥ من أصل ٨٠٠، يعني رقم كبير، ورحت جبت شنطة لونها أحمر، ومش عارف إيه المبرر إني أجيب شنطة لونها أحمر، بس أعتقد استشفيت من بدري إن ذوقي وحش، في أول يوم يا مؤمن، أول يوم، يعني مش ثاني يوم! لا.. أول يوم، رايح بالشنطة الحمراء، وماشي كدا كأني ملك، أصل الحاجة اللي بتيجي بعد شوقه يبقى ليها طعم ثاني.

المهم يا سيدي، بنت كدا ماشية ورايا، واتكعبلت، ومش لاقية حاجة تمسك فيها، برافو عليك، مسكت في الشنطة بتاعتي، أنا وقعت والشنطة اتقطعت، ورجلي اتعورت، متخيل أنت يعني بقالي شهور عاوز شنطة، وأول ما ألبسها تتقطع! حلوة العضمة في الفشة، صح.

فضلت سنة شغال في شغلانة أي كلام كدا، وربنا كرم، والفلوس مشيت في أيدي، وقررت أروح أعمل شوبينج، وطبعاً الشوبينج بالنسبة ليأهو إني أشتري قميص، قررت إني أجيب قميص أسود، بكام القميص يا خال؟ قالي بـ ٢٥٠ جنيه، يا عم أنا أصلاً بقبض ٥٠٠ جنيه، بس ولا يهّمك، مش خسارة فيك، القميص

كان حلو الصّراحة، وفعلاً لبست القميص وحتّيت برفان، ويوم
حلو قوي، هروح الشّغل بالقميص الأسود، صحيت.. لبست،
كنت فرحان زيّ العيّل الصّغير، ممكن تضحك عليّا دلوقت، بسّ
فعلاً كنت فرحان زيّ العيّل الصّغير، ولبست ووظبطت الدنيا.

وطلعت من البيت، في الموقف قابلت سواق جميل، قالّي
اتفضّل يا باشا، حسّيت بقيمة القميص، باب العربية فيه مسمار،
جاب القميص نصّين، خدّ قلبي وراح، خدّ أملي وراح، تقريباً
عربيّات شارع «ناهيا» كلّها فيها مسامير، واللّعبة إنك ازاي تتركب
من غير ما المسمار يزغزغك.

وكما قالت أمّي، إيه اللي حصلك! ما انت نازل حلو، راجع ليه
زيّ بكيزة وزغلول.

نصيحة (٢٤)

فقدان الرّغبة في ممارسة الفعاليّات اليومية الاعتيادية

الإحساس بالعصبية والكآبة

الإحساس بانعدام الأمل

نوبات من البكاء دون أيّ سبب ظاهر

اضطرابات في النوم

صعوبات في التركيز

صعوبات في اتخاذ القرارات

زيادة أو نقصان الوزن دون قصد

عصبية

قلق وضجر

حساسية المفرطة

إحساس بالتعب أو الوهن

إحساس بقلّة القيمة

فقدان الرغبة في ممارسة الجنس

أفكار انتحارية أو محاولات للانتحار

مشاكل جسدية دون تفسير، مثل أوجاع الظهر أو الرأس

... لو بتحسّ بعرض من الأعراض دي، أو كلّها؛ فانتَ مريض

نفسي، أو بتعاني اكتئاب، ولازم تراجع دكتور نفسي، دا شيء مهمّ

لصحتك، الطب النفسي مش عيب ولا نقيصة، النقيصة إنك تضيع

عمرك عشان مكسوف من نظرة الناس ليك.

الحكاية (٢٥)

أسيوط

لو قرّيت روايتي «ما بعد رحيله» فالرواية دي فيها جزء كبير بيدور في أسيوط، أنا أصلاً مروحتش أسيوط في حياتي قبل كدا، وأنت أكيد عارف السمعة السيئة اللي واخداها أسيوط، السبب في القصة دي إن الشباب لما بيعجي يقدم للجيش.. لو كان من سكان محافظات «أسيوط - سوهاج - الوادي الجديد» فلازم تروح لأسيوط، وهناك في أسيوط المدينة سواقين التاكسي، البياعين؛ بيحاولوا يستغلوك بكل الطرق، ومن هنا جات فكرة السمعة السيئة لأسيوط.

سألت محمود صديقي، قالي إوعى تروح تركب ميكروباص، أنت تركب القطر الممي اللي بيعدي على القرية الساعة ٤ العصر، قلت له بياخد قدّ إيه وقت؟ قالي همّا ساعتين بس. يا بني إذا كان الميكروباص بياخد ٣ ساعات! قالي دا سريع، دا المنجز.

لو حدّ بيعدي السّكك الحديد يقف، زفة تعدي ينزل يهزّ، ويؤدي
الواجب، والعريس والعروسة يطلعوا يسلموا، واحدة بتشر
الغسيل ينزل ياخذ له فمين.. واحد بيشر بعصير قصب ينزل
ياخذه بقين.. الموضوع طوّل بطريقة بشعة.. اتأخرنا ساعة.. لأ
اتنين، لع.. لع.. ٣ لع لا.. القطر وصل في سبع ساعات.. والله
ما بكذب عليك. فيه واحدة حامل ولدت في القطر.. ومتهيّالي
هيسموا الولد فلنكات.. المفروض القطر يوصلني الساعة ٦..
وصلني الساعة ١١.. تليفوني فصل، وسبايدر مان ظاهر جلياً
في أسيوط.

نزلت اشترت بنظلون، وشحنت التليفون ع القهوة.. اتصلت
بصاحب صاحب صاحب واحد صاحب محمود صاحبي، تليفونه
مقفول.. فضلت للساعة ١ التليفون مقفول. أرّن على محمود يقولي
طيب هطلبه، شوية وتليفون محمود نفسه اتقفل.. الله يخرب بيتك
يا صاحب صاحب صاحب واحد صاحب محمود. صاحبي..
طيب أنزل في لوكاندة للصبح! أنا أخاف اتسرق.. طيب أبات في
المسجد! لا يا عم.. مش هعرف، فجأة جاء الفرج.

الطفل اللي كان معايا في القطر، عدّي عليّ، وبأعلى صوت:

- لابس بوكسر سبايدر مان أهو.. أهو.

وكانت الانفراجة، الساعة ١ ونص، الرّاجل اتّصل بيّا،
ووصفلي الطريق، مش فاكر العنوان، بسّ هي كان خير اللّهم اجعله
خير، برج كبير جدّا، كان فيه بتاع ١٠٠ شقة، كلّ دور فيه ٨ شقق
تقريبًا، كنا احنا في الشّقة الأخيرة في آخر دور، أنا المفروض هروح
التّجنيد الساعة ٥ تقريبًا، ووصلت الشّقة الساعة ٢ وشويّة، يعني
يادوب انام ساعتين وانزل، وصلت مش شايف قدّامي، والناس
مشكورين فضّولي مكان ودخلت انام، يا دوب عيني بدأت تروح
في النوم، وبدأت أسمع أصوات غريبة، قلت في نفس ك «خضر
محمد الجبالي» بتّ يا سعدية نامي بالهدوم، اهدوا يا جماعة صلّي على
النبي...

تمّ حذف بقية الصفحة من الرقابة.

نصحية (٢٥)

فيه موقع طبي اسمه medical daily، عمل دراسة لطيفة عن تأثير تربية الكلاب، على الصّحة النفسية ومحاربة الاكتئاب، وكانت النتائج إن تربية الكلاب ليها فوائد نفسية زيّ تقليل القلق ومحاربة الأمراض العقلية، وتقليل خطر الإصابة بأمراض القلب، وحياة اجتماعية أفضل.

أنت بتكذب يا أبو صلاح، إيه علاقة الكلاب بأمراض القلب؟ في دراسة اتعملت سنة ٢٠١٧ على الناس اللي بتربي كلاب، والناس اللي مبتريش، ولقوا إن تربية كلب يقلل خطر الإصابة بالوفاة بأمراض القلب والأوعية الدموية لـ ٣٦٪ ممن يعيشون بمفردهم، والدكتورة توفى فال، أستاذ علم الأوبئة بجامعة أوبسالا بالسويد، قالت إن السبب في دا الدعم الاجتماعي اللي بتوفّره الكلاب لأصحابها.

أنت عايزني أربيّ كلب يعني!.. لا خالص، أنت اعْمَل اللي تعمله، المهمّ تكون مبسوط.

الحكاية (٢٦)

السينما

أول مرة اشتغل في الصحافة، اشتغلت مع حمادة عبد الوهاب في جريدة اسمها البينة، في منطقة العمرانية، في كنيسة هناك، وفيه مسجد اسمه «محمد رسول الله»، كانت الناس تقول للسواق، عند كنيسة «محمد رسول الله يا اسطى لو سمحت».

عملنا أنا وحماده شغل حلو، فالرّاجل حَبّ يكافئنا فادّانا خمسة جنيه، لا مش خمسين.. أنت قريتها صحّ خمسة جنيه، يعني كلّ واحد ٢ ونص، المهمّ.. بالمُناسبة دي قرّرنا نحتفل، طيّب نعمل إيه، ندخل السينما، إحنا في الأوّل هنجيب ٢ كانز (الكانز كان بـ ٣ أصلاً) مش مهمّ.. المهمّ نحتفل.

في اليوم دا كنت متغديّ تونة من أردأ أنواع التونة الحقيقة، والجوّ كمان كان برّد، وأنا عايش دور أحمد رمزي، القميص بتاعي كان فيه ٦ زراير.. أنا كنت فاتح سبعة منهم، رُحنا كايرو مول في الهرم، وطبعًا حالة كايرو مول كأَيّ حاجة عليها اسم كايرو، كان يُرثى ليه.

في السينما، كانوا عارضين فيلم أمير البحار بتاع محمد هندي..
 قطعنا تذكرتين بـ ٤٠.. مش مهم، المهم نحتفل.. دخلنا السينما من
 هنا وانا اشتغلت ترجيع من هنا، التونة مع سيناريو يوسف معاطي
 عملوا أحلى شغل، معقول أكون اتحسدت عشان الخمسة جني،
 المهم قعدت ارجع.. وحمادة يصرخ.. نروح الحمام، الرجل بتاع
 النضافة يشوف حمادة ساندي وانا بتطوح يقول طيب انا هسيبكم
 على راحتكم.. ربنا يهنيكم ببعض.. استنى يا ابن الكلب.. أنا
 راجل قوي، وحمادة كمان. نرجع نخش الفيلم، نلاقي الفيلم جري
 منه ١٠ دقائق، وهنا ميزة السيناريسـت يوسف معاطي أنت لو
 غبت في الحمام ساعة مش عشر دقائق ترجع تكمل الفيلم، وعادي
 تبقى فاهم، ومفيش حاجة فايتاك. مش مهم.. المهم نحتفل.

الموضوع قلب معايا بدوخة وغمّة نفس.. ضيف عليهم
 الترجيع، تقريبا كدا كل أعراض الحمل توفرت فيا، الكرسي اللي
 قدامي كان فيه بنت مع خطيها، وواضح إن مشاعرهم كانت
 جياشة؛ لأن من كتر ما هي جياشة أنا رجعت كل اللي في بطني
 في حجر البنت، طبعا قعدوا يزعمقوا، بس تفهموا الوضع عشان
 تعبنا، هو آه البنت شتمتني بكل الشتائم اللائقة وغير اللائقة، بس
 ربنا يسامحها. الواد نقل مكانه وجه بداها.. شوية بشوية حمادة جاب
 لنا فشار.. بطني اتملت تاني.. وطالما اتملت لازم أعمل إيه! برافو

عليك.. لازم ارجع، بسّ البنت نقلت!.. أرجع على خطيبها بقى
عشان محدش يزعل.. الناس هلكانة من الضحك والبنت والولد
بيعطوا.. البنت اتعورت في بلوزة، الولد اتعور في بنطلون جينز،
حمادة اتعور في تذكرتين السينما وتمن الفشار، يكونش الخمسة جنيه
ملعونة!

الفيلم خلص، الواد قاللي يا أستاذ يا أستاذ. نعم يا بيه. قاللي
تصدق بالله، أنا ما هدخل السينما تاني عشانك.. حاولت اديله
الخمسة جنيه ترضيةً ليه، بسّ خفت من ردة فعل حمادة.

حبّيت إن السينما الصراحة، ما هو يوم زيّ دا يحبّب في السينما
الصراحة، وخصوصًا إنّي مش هعرف اصرف الخمسة جنيه كلّها
مرّة واحدة، فروحت تاني.. بسّ دي قصّة تانية خالص.

نصيحة (٢٦)

في دراسة بريطانية، اتّعملت سنة ٢٠١٨، خلصت لأنّ الذّهاب المنتظم إلى السينما أو قضاء يوم في متحف أو مشاهدة مسرحية، أو كسر الرّوتين اليومي المعتاد إنّ شاء الله حتّى تروح الملاهية وتركب لعبة الدّودة؛ كلّ دي طرق يمكن أن تساعد في الوقاية من الاكتئاب في سنّ الشيخوخة.

ونقلت صحيفة «الإندبندنت» عن جامعة لندن أنّ هذه الطرق ليست فقط ممتعة لتحقيق أقصى استفادة من وقت الفراغ؛ بل إنّها تثري الذهن، وتحميه أيضًا، وبتخلّيه حاضر.

وذكرت الدراسة، التي نُشرت في المجلة البريطانية للطبّ النفسي، أنّ «المشاركة الثقافية» المنتظمة قد تساعد كبار السنّ، وخاصّة من يعانون من الوحدة؛ في العلاج من الاكتئاب.

وباستخدام أكثر من ٢٠٠٠ شخص من البالغين الذين تعدّوا سنّ الـ ٥٠، وجد الباحثون أنّ الأشخاص الذين حضروا

المعارض، وشاهدوا الأفلام، أو ذهبوا إلى المسرح مرّة واحدة في الشهر، أو أكثر؛ كانوا أقلّ عُرضة بنسبة ٤٨٪ للاكتئاب.

لو معاك طفل صغير، علّمه القراءة، وحبّه فيها بأنك تقرا كتاب، يا سيدي أنتَ عندك تحفّظ على السينما وشايف إنها حرام؛ أنتَ حرّ، اركب الدودة بقي، اعمل اللي تعمله.. المهم تنبسط.

الحكاية (٢٧)

عرض لا يمكن رفضه

في المافيا، فيه مصطلح اسمه «عرض لا يمكن رفضه»، ودا لأنك لإما تقبله لإما تموت، في سنة ٢٠١٢.. كنا أنا والأخ عصام خضيري بنعمل صفحة في جريدة الأحرار؛ اسمها «روبا بكيا»، وساعتها كتبت أول مقال ليّ.. ونزل بصورتي، كنت ساعتها عندي ١٩ أو ٢٠ سنة.. وكُنت أبيضاني، وعيوني زرقا، وشعري أصفر... «بكذب طبعا».

المهمّ.. الجرنال دا كان عندنا في العيلة بيتباع أكثر من مجلة «طبيبك الخاص»، كلّ العيلة اشترته تقريبا، أول مرّة حدّ من العيلة- مش صورته- ينزل في الجرنال، لا صورته كمان، ابن عمّي كان قاصص الصّورة ومعلقها في العربية، بنت عمّي كانت عاملة المقال ميدالية وماشية تطوّح فيها، فقدت اتنين البصر لدرجة إن أختي كانت رايجة تولد في مستشفى سوهاج العام، فخذت نسخة من الجرنال.. على أساس لو حد سأها تبّع مين أو حد ضايقها؛ توريله

صورتني في الجرنان، اللي هو أنت مش عارف أنت بتكلم مين! أنا أخويا بهاء حجازي، بإشارة واحدة يوديك ورا الشمس، مكانوش يعرفوا إن جرنان الأحرار بيوزع ١٠ آلاف نسخة، بيرجع منهم ١٢ ألف، دا في جرايد تانية يا راجل كانت بترجع شغلها عندنا، أنا لما رُحِت الأحرار عملت طفرة، أهلي كانوا بيشتروا عشر نسخ من كل عدد، المهم لم تكن تعلم أختي أن ما قامت به هو بداية اللعنة. أختي خدتِ الجرنال، وكان معاها أختي التانية كمرافق.. الدكتور حجزهم أسبوع قبل الولادة.

في المستشفى، كان محجوز بنت اسمها زينب، عارف أنت قصة حكاية بنت اسمها ذات للكاتب «صنع الله إبراهيم»، أنا هكتب قصة واسمها «حكاية بنت اسمها زينب»، زينب دي لا اتعلمت ولا راحت أي مدرسة في حياتها، بس أمنية حياتها تتجوّز واحد مشهور، مشهور في أي حاجة، مش مهم.

طيب ازاى هتتجوّز واحد مشهور وهي لا راحت مدرسة ولا بتاع! كان نفسها تتجوّز أحمد عزّ بتاع السينما، أو بتاع الحديد قبل الثورة، بس لما الدنيا غدرت بيه، نقلت على طول، وهي بتنقل كدا لزقت في المقال اللي مع أختي، هي اتعرفت على أختي، وراحت أختي كنوع من إثبات الذات، وكنوع من الفشخرة الكدابة ورّيتها

صورتني في الجرنال.. زينب عنيتها لمعت، وقالت إيه دا مشهور، أوه شهرة، وقالت هوّ دا.. خدت نمرتي من أختي.

كنت وقتها واقف في الشّارع على عربية فول، وبستلذّ وأنا بقسم بصلاية نصّين.. التليفون رنّ.. ساعتها مكانش في ترو كولر، أو أنا مكتتش اعرفه.. ردّيت: - ألو.. أستاذ بهاء، أنا عنحبك.

دا أسرع اعتراف بالحبّ حصل في تاريخ الإنسانية، من غير لا أهلاً وسهلاً، أنت مش مشهور، أيوه، يبقى بحبك، طبعاً استغربت جدّاً.. مين اللي بيحبّ حدّ دا من أوّل ألو! ساعتها قلت في نفسي، حبّتي من «ألو»، لا ثانية.. أنا أصلاً مقولتش ألو، تكونش يا واد روميو، باين عليك روميو وانت مش واخذ بالك من نفسك، والحريم هتقطع روحها عليك وهتبقى مصيبة.

قلت لها انت مين؟

- أنا واحدة مُعجبة.. وعنحبك.

وخذّ عندك على الحال دا بتاع أسبوع، أصحى الصّبح على اتصاها «بهاء أنا عنحبك».. أيوه ما هي شالت الألقاب بقي، مفيش أستاذ.. وبالليل تصبح على خير يا بيبو.. أنا بحبك..»

بعدها بشوية حلوين قدّمت لي عرض مُغري لا يمكن رفضه..
بصّ يا بهاء أنا عندي أربع اخوات رجالة وأنا البنت الخامسة.
عادي طيّب ما انا عندي أربع اخوات رجالة وأنا الولد الخامس،
أبويا بنى بيت ٥ ادّوار في وسط الزراعة، يعني البرسيم حواليه من
كلّ حتّة؛ وماله تلاعبونا على البيت يعني! موافقين. أبويا قالّي إنّني
هتجوز في البيت بتاعنا، وجوزي أبويا هيجيبه عربيّة ميكروباص
«نطققتها ميكروباظ»،.. وانت أولى بيها.. وكم ان هيكْتبلك شقّة في
العمارة بتاعة مصر باسمك.. ها... قُلت إيه!؟

الحقيقة أنا ساعتها مع طيش الشباب.. أنا رفضتِ العرض،
بسّ بعد ما الدّنيا جابتني وودّتني، أنا بقولّك أهو:
- أنا آسف يا زينب، لسه البرسيم محاوط بيتكم من كلّ ناحية.

نصيحة (٢٧)

أتجوز زينب؟!!

الحكاية (٢٨) لازم أروح المعرض

لحد فترة قريبة كنت فاكر إن اسمه الفن التشكيلي.. وكنت ببرر التسمية دي بإن لوحات الفن دي بتشككك في نفسك، وتخليك تسأل هوّ دا فنّ واللّا لأ.. دافنّ واللّا لأ.. ودا شكّ؛ عشان كده سمّوه التشكيلي. كنت بدّرس مادة اسمها «نقد وتذوق فني» مع دكتور من أطيب الدكاترة اللي اتعاملت معاهم في حياتي؛ الدكتور (مجدي عبدالعزیز).. وفي محاضرة طلب منّا عمل زيارة لمعرض جاذبية سري للفنون التشكيلية.. وكنت أول مرّة أسمع النطق الصحيح لها. طبعا أنا وقعت في حيرة من أمري.. أروح واللّا ما اروحش! العلم بيحتم عليّا إنّي أروح وأنقُد؛ لأنّي مطلوب منّي كمان كتابة تقرير عن إحدى اللوحات اللي عجبتني، وطبعاً لأنّنا بحب العلم؛ مروحتش. وقامت زميله مشكورة- مش فاكر اسمها، بسّ تقريباً هيّ التجوّزت، وجوزها اسمه محمد محسن السيد- بزيارة المعرض والتقاط الصور. وبعثلي الصور بالبلوتوث. وقفت قدام الصورة

اللي كانت عبارة عن شخبطة بالفرشاة بأربع ألوان (أحمر وأخضر وأبيض وبرتقالي).. قعدت باصص كثير جداً جداً.. وتنحلتها وقلبت الموبايل في كل الاتجاهات إني أفهم حاجة.. مفهمتش، ومسكت الورقة علشان أكتب تقرير.. إن تطلع مني كلمة يا مؤمن.. لا يمكن!. وفي النهاية رُحت المحاضرة من غير ما اكتب حرف واحد، وخذت الورقة بيضا في إيدي للدكتور. وفي المحاضرة الصبح، الدكتور مجدي سأل مين اللي راح معرض الدكتور جاذبية سري؟ كل الطلبة رافعين أيديهم، والواحد مرسوم على بقه ابتسامة أكبر من اللي على كيس الشيبسي، ودونا عن كل الناس اللي في المحاضرة، دوننا عن الشقرا والسَمرا وأمّ روح حلوة؛ كلهم حلوين جتنوني، يقول لي تعالى يا بهاء قول لي إيه اللوحة اللي عجبتك؟ طلعت بقدّم خطوة وبرجع ٦ خطوات لحدّ ما وصلت وادّاني المايك، وياريته ما ادهولي، وقال لي انطلق يا مايسترو، واقرا لي التقرير بتاعك. بصّيت للورقة، وكان إحساسي زيّ إحساس محمد هنيدي في بداية فيلم همّام في أمستردام (مش فاهم حاجة).. وكلّ الوشوش اللي كانت مبسوطة بصّالي قال يعني هقول حاجة مفيدة! اتنحنت (من النحنة والتناحة)، وقلت: بداية، واضح تأثر الدكتور جاذبية سري بالثورة؛ فاللون البرتقالي دا مش برتقالي.. أبسلوتي؛ دا لون أحمر لون الدم اللي أريق غدر على يد

البطش اللي عبرت عنه بلون بني، لم يشغل حيزًا في لوحتها لأنه بتقول إنه مهما تعاضم فهو ضئيل.. أما اللون الأخضر فدا إن دلّ على شيء فيدلّ على النظرة المستقبلية لمصر، وكلنا عارفين إن دلّ القهوة خير، لا.. مش دي، كلنا عارفين إن الأخضر بيدلّ على الرّخاء والخير.. وغاب عن الفنانة الألوان المائية لأنها بيغلب عليها الحزن.. عكس الألوان المائية اللي بتدي إحساس بالفرح. بيصّ الأقي الدكتور مجدي قام وسقّلي، وقال لي تحليل عبقرى، للوحة أكثر من عبقرية، هات.. التقرير بتاعك 5 من 5 في أعمال السنة، أنت حاجة مشرفة يا بني. هو يسحب في الورقة بتاعة التقرير وانا اسحب فيها، لحدّ ما سحبها مني ولقاها فاضية، وقال لي إيه دا!!! إنت مكتبتش التقرير.. لقتني بقول له:

؟ - أنا من جمال اللوحة معرفتش انزل عيني من عليها.
قال لي أمال الورقة البيضاء دي إيه؟! قلت له دي لوحة يا دكتور،
لوحة تعبّر عن الفضاء الفسيح في عصر الانبطاح الأهوج. قال
لي أنت جواك فنّان يا بهاء. ومن ساعتها وانا بفكر افتح أتيليه!
قول لي بقى.. تعرف انت إيه معن عصر الانبطاح الأهوج؟!.

فمن كان له من الله نصيب من نعمته
فليعلم ان الله لا يترك احد من عباده
يذوق حزنه الا ان يشاء الله
والله ذو الجلال والإكرام
فمن كان له من الله نصيب من نعمته
فليعلم ان الله لا يترك احد من عباده
يذوق حزنه الا ان يشاء الله
والله ذو الجلال والإكرام
فمن كان له من الله نصيب من نعمته
فليعلم ان الله لا يترك احد من عباده
يذوق حزنه الا ان يشاء الله
والله ذو الجلال والإكرام

من غير نصيحة، لحد ما تعرف
يعني إيه عصر الانبطاح الأهوج.

فمن كان له من الله نصيب من نعمته
فليعلم ان الله لا يترك احد من عباده
يذوق حزنه الا ان يشاء الله
والله ذو الجلال والإكرام
فمن كان له من الله نصيب من نعمته
فليعلم ان الله لا يترك احد من عباده
يذوق حزنه الا ان يشاء الله
والله ذو الجلال والإكرام
فمن كان له من الله نصيب من نعمته
فليعلم ان الله لا يترك احد من عباده
يذوق حزنه الا ان يشاء الله
والله ذو الجلال والإكرام

الحكاية (٢٩)

بابا، أنا عاوز اتجوز أبله منى

في سنة ٢٠٠١، أنا كنت في تالته ابتدائي، وكنت بحب المدرسة بتاعتي جداً.. كان اسمها منى، رُحت قلت مبدّهاش بقى.. أنا دلوقتِ في ٣ ابتدائي، ولازم اعتمد علي نفسي واتجوزها، ونفتح بيت ونربّي ابنها اللي هو أصلاً أكبر مني بسنة.. بس أنا هكون له بمثابة الأب، وممكنة الأيس كريم. المهم فجأة خدت أجازة وحسيت قدّ إيه الدّنيا غدرت بيّا.. الأجازة طوّلت وانا لسّه في الحبّ خيخة، رُحت قلت مبدّهاش بقى؛ لازم اثبت رجولتي وأروح اطلب إيدها.. رُحت قلت للحاجّ ابو أشرف (أبوي) بقول لك إيه يا حاج! في موضوع كدا عاوز افاتحك فيه. قال لي:

- تفاتحني تقفلني مش هنزود المصروف عن رُبع جنيه.

قلت له: لا مش هنزود المصروف؛ كلّ القصّة إنّي محتاج اكمل نصّ ديني (قال يعني انا كنت كملت النصّ الأوّلاني!). قال لي تكمله ازاي؟! قلت له عاوز اتجوز الأبله منى. راح ضحك ونادى على امي وقال لها: تعالي شوفي بهاء عاوز يتجوز!.

أمي دخلت برياً كشن كريمة مختار في العيال كبرت (ما هو
الوادّ يتحبّ يا رمضان!).. وباسّني وخرجت من المشهد.
فابويا أبدى اهتمام واضح، وقال لي وانت إيه اللي عاجبك
فيها يعني! اشمعني هيا؟ قلت له بتديني عشرة من عشرة،
وبتعمل نجوم كثير في الكراسية، ومرة قالت لي شاطر يا حبيبي.
طبعاً زيّ ما انتوا شايفين.. دي أسباب كافية إنّي اتعلق بيها،
ودي كانت أسباب مُقنعة لابويا إنه يوافق على طلبي، خصوصاً
إنّي في تالته ابتدائي؛ يعني شهادة، ولازم اذاكر لأنّي داخل
على رابعة، وهدرس إنجليزي بقى وعلوم ودراسات! المهم..
أبويا قال لي وهيّ فين دلوقتٍ؟ قلت له أنا سألت قالولي واخدة
أجازة وضع (كنت فاكرها زيّ راس السنة كدا!).. راح ابويا
قال لي يعني وينفع ندخل ع الست وهي بتوضع يا بهاء!، استنى
أما تقوم بالسّلامة وبعدين نروح نخطبها لك من جوزها،
وهو يعني الرّاجل هيلاقني أحسن منك فين! واحد شاطر
ومؤدّب، وبتاخذ ١٠ من ١٠.. إنت عريس لُقطة الحقيقة.
طبعاً دي كانت أوّل قصّة حبّ فاشلة في حياتي؛ لأنّها بعدها بفترة
جات وجابت معاها ابنها الرضيع، فأنا اتصدمت بقى، وطلعت كلّ
همي في المذاكرة، وبقيت العيّل الدّحيح اللي بيسرّح شعره ع الجنب.

في تانية ثانوي، وقعت في قصة حبّ عنيف.. حبّيت واحدة
كدا كان فيه صلة قرابة بيني وبينها، ومش عارف ليه كنت فاهم
الحبّ على إنه زعيق.. كنت كلّ ما اشوفها ازعق فيها.. شخّط
في شخّط على طول بقى لحدّ ما البنت جاها الرعّاش منّي!
المهمّ.. البنت مفسّرتش رسائل الحبّ اللي بيعتهاها في زعيق،
وصادف إنّ البنت دي قعدت مع أخت من اخواتي البنات،
فالبنت قالت لاختي «أخوك بهاء محتاج يتعالج.. ودّوه لدكتور
منخّ وأعصاب كويس».

في تالته ثانوي، وقعت في حبّ جديد خالص، اللي هوّ الحبّ
بتاع التليفونات، دا اللي بيحتاج يشحنوله كثير، وربّنا يبارك لي في أمّ
شريف «أمّي» كانت هي اللي بتوفّر لي مصادر الدّخل في الفترة دي.
وبسّ يا سيدي من الساعة ١٢ بالليل للساعة ٤ الفجر وانا بتوت في
وذّن البنت.. مش عارف كنا بنحكي في إيه.. الغريب بقى في الأمر
إنّ البنت دي كانت معايا في المدرسة، كنت برضه كلّ ما اشوفها
بزعق فيها، يلا بقى.. إنتوا فهمتوا بقى.. الحبّ يعني زعيق... هي
برضه مستحملتش وطفّشت.

نصيحة (٢٩)

مهمّ قوي إنك تحكي مع طفلك وتفهمه، متسيسيش الطفل
يستكشف الحياة لوخده، ومهمّ زيّ ما بتوفّر له احتياجاته من أكل
وشرب؛ توفّر له احتياجه لأب يسأله ويفهم منه، أنت مش مكنة
فلوس.

الحكاية (٣٠)

القلم يا إيمان

في الإعدادية، كان في فقرة ثابتة في الإذاعة المدرسية اسمها (سؤال وجواب)، والي هيجاب بياخد جايزة. أنا كنت في ٣ - ٣.. وكنا بنتنافس دائماً مع ٣ - ١ على لقب الفصل المثالي (وطبعاً كانوا همّ اللي بيكسبوا!). في يوم كانت الإذاعة من نصيب فصل ٣-١، وكانت بتقدّم الإذاعة بنت اسمها إيمان عتريس، وكان السؤال.. مَنْ هو الصّحابي الملقّب بـ «ذو النورين»؟ هو سؤال سهل، ومعروف، وكانت الجائزة قلم فرنساوي بـ ٣٥ قرش.. أكاد أجزم أنّ إيمان كتبت بيه لحدّ ما سلخته. الشّيخ حامد، مدرّس اللغة العربية، قال لي أطلع هات القلم لفريقك (عن إحساسي بالفخر في اللّحظة دي)، طلعت.. بسم الله الرحمن الرحيم، الإجابة عثمان بن عفان. طبعاً إيمان متعدّيهاش.. لا أبداً. قول في المايك. حاضر، بسم الله الرحمن الرحيم.. الإجابة عثمان بن عفان، هاتي القلم بقى عشان الشيخ حامد عاوزه. قالت لي طيّب، ليه سمّوه ذو النورين؟ قلت لها عشان اتجوّز

بتتين من بنات النبي، هاتي القلم بقى. قالت لي استنى انت متسربع على إيه! مين بنات النبي بقى اللي اتجوزهم؟ قلت لها السيدة رقية، والسيدة أم كلثوم، أظن بقى تجيبي القلم. قالت لي استنى شوية، آخر سؤال بقى.. هو ليه ألقاب تانية غير ذي النورين؟ قلت لها هو ثالث الخلفاء الراشدين، هاتي القلم بقى. قالت لي لا مش اللقب دا، أنا عاوزة لقب تاني زيّ ذو النورين. قلت لها هو كمان ذو الهجرتين لأنه هاجر مرتين. قالت حلو قوي، هاجر فين.. وفين؟ بعدت وشي عن المايك، وقلت لها خلاص مش عايز القلم دا اللي ذليت اللي خلفوني بيه. قالت لي لأ قولها في المايك. أقولك بحبك في المايك يعني؟ لأ.. قول مش عاوز القلم. قلت لها دا بعدك، إنت عاوزة الشيخ حامد ياكلني! مسكت المايك.. هاجر عثمان بن عفان الي الحبشة، ثم هاجر إلى المدينة، تمكن تجيبي القلم كدا لآحسن الشيخ حامد هيزعل يا إيمان. قالت لي يا بني متسربع ع القلم! والله هتاخده، آخر سؤال بقى.. هو عثمان بن عفان اتجوز تاني غير بنات النبي؟ رُحت مشمر بقى.. ما انا مش هحضر دكتوراه بالقلم بتاعها دا! وطبعًا بعد ما بقى واضح إنني مش همشي من غير القلم؛ ادتيهولي. يادوب رجعت خطوتين، وداخل على مكان الفصل في الطابور، إلا والشيخ حامد يقول لي برافو عليك، هات القلم بقى. وخدّه مني.

دخلت الطابور وانا بفكر ازاي اقتل إيمان، وأحط سم للشيخ
حامد في الآيس كريم! بس يا سيدي.. طلعتنا الفصول لقيت الشيخ
حامد جايب لي القلم قال لي خُد يا بني؛ دا مجهودك واحنا مبنقبش
الحرام. اتأثرت طبعًا، وقلت خلاص هسم إيمان بس.. بكتب كدا
بالقلم مكتبش، أتاريه قلم خالصان، ومش عارف هل إيمان جايباه
خالصان، واللّا الشيخ حامد خد القلم وغير الأنوبة بتاعته! ومن
ساعتها وانا الشك هيموتني.. يمكن دا اللي خلاني أحول أدبي في
ثانوي عشان أدرس فلسفة، وأدرس الشك، وأقدر أوصل لنتيجة
منطقية.

طبعًا تاني يوم، إحنا طلعتنا الإذاعة، وانتقمت لشرفي وفصلي
وللشيخ حامد، سألت بنت من البنات عن أسامي العساكر اللي
ماتوا في الحرب العالمية الأولى.. عسكري عسكري، بجنسياتهم،
بأرقامهم العسكرية، بمقاسات فانلاتهم الداخلية، وفي الآخر..
أديت للبنات قلم رصاص تم استخدامه من قبل ٣ آلاف مرّة.

نصيحة (٣٠)

وأنت بتشجع ولادك على الاجتهاد في الدراسة، إوعى تنسى
تشجعهم يعيشوا الحياة، يبقى ليهم أصدقاء، يبقى ليهم نشاط،
يبقى ليهم هواية يطلعوا فيها الطاقة بتاعتهم، متهيألي إن يبقى
عندك طفل عاش الحياة وبقي محمل بالتجارب، أفضل بكثير من
أن يبقى عندك عيّل الأوّل على دفعته؛ بس مالوش أي تجربة!.

الحكاية (٣١)

منجّد بنت العمدة

تقريبًا.. أنا أكثر واحد الناس بتشبهه عليه، مبيعدّيش أسبوع غير لما حدّ يشبهه عليّ، تحسّ إنّ الموديل بتاعي نازل منه كثير.

مبركّبش القطر نهائي غير وانا حاجز تذكرة، لحدّ شهر 5 سنة 2014.. كنت مسافر الصعيد، وكنت عسكري جيش، المهمّ قعدت بين العربيات وقعد جنبي أمين شرطة اسمه «أمين»، شايف القلشة اللي هوّ لما حدّ ينادي عليه بيقلّله يا أمين أمين، أو الأمين أمين لسه مجاش.

الأمين أمين فتح الكلام:

- أنا حاسس إنّ شُفتك قبل كدا، هوّ انت بتشتغل إيه؟

قلت له:

- أنا ميكانيكي سيارات، وساعات بتشتغل منجّد.

قال لي:

- صحّ. نجّدت قبل كدا في المنيا؟

= يوه.. دا انا مجوز نص بنات المنيا.

صراحة الرّاجل كان عمّال يكذب- من أوّل ما ركبت- على
الناس اللي جنبنا، فقلت أسرح أنا بيه شوية، المهمّ لما زهقت منه،
دخلت جوا عربية من عربيات القطر، لفيت لفّة ورجعت، أوّل ما
دخلت بصلي وقال لي:

- افكرتك؛ مش انتّ اللي نجّدت بنت العمدة.

هوّ قصده نجّدت لبنت العمدة.

راكب المترو من المرج لكوبري القبة (المستشفى)، لقيت
واحد داخل عليّا، والفرحة هتنطّ من وشّه، راح واخذني
بالحُضن، قال لي:

- أنا عارفك.

ساعتها كان ليّا كتاب «سنوات المُرز الضّائعة»، ورواية «لم
تعتنق دينًا بعد»، قلت:

- بسّ؛ الشّهرة لعبت معايا.

رُحت حاضنه بضمير، حُضن مطارات كدا، فالرّاجل بنفس
الفرحة الطفولية، قال لي:

- والله ما كلنا الفاكهة الحلوة غير من إيدك، واحشني يا معلّم ضاحي.

طبعا العربية كلها كانت انتبهت، رُحت حاضنه قوي بقى.
(دي تاني مرّة يتقال لي يا ضاحي، لدرجة إني بقيت متأكد إن حدّ من أشباهي الأربعين اسمه ضاحي).

من المواقف اللي عمري ما أنساها في معرض الكتاب اللي فات.. الطابور كان طويل قوي، كنت هموت وادخل، عندي ميعاد جوا، وخايف اللي مستنيني يمشي، اللي زود الأزمة إن الشبكة كانت سيئة جدا جوّه فمش عارف أوصله بالتليفون.. المهمّ لقيت بنت دخلت من طابور مختصر، وقالت لأمين الشرطة إننا صحفية راح مدخلها.

يا سلام طيب ما أنا صحفي! رُحت للأمين اللي عدّي نص مصر تقريبا من طابور الصحفيين، وقال لي عندك. قلت له أنا صحفي. قال لي وإيه اللي يثبت لي؟ قلت له حُضن.

الراجل اتضايق، وقال لي: «يا أستاذ، وانا أي حدّ هيقولي صحفي هدخله! فين كارنيهك؟».

لحظي الوحش كنت ناسي الكارنيه، فتحت المحفظة.
 ملقتش غير الآي تي إم (الفيزا كارد) بتاع البنك الأهلي. أخضر
 كذا وجميل.. رُحت مطّلعوه له (الآي تي إم) طلّعته وانا متوقّع
 إنه هيهزّقني، الرّاجل بصّ فيه، ولقى أرقام كثير، واسمي
 بالإنجليزي، قال لي:

- طالما معاك الكارنيه مطّلعوش ليه من الصّبح!

نصيحة (٣١)

في العالم كله، لقوا إن أداء أفراد الشرطة السيئ سببه إنهم
مبيخصلوش على قدر كافي من النوم، لذلك الحصول على قدر
كاف من النوم شيء مهم جدًا جدًا لحمايةك من الاكتئاب.

قلة النوم بتأثر على الجهاز العصبي، اللي بدوره بيأثر على
إحساسك بالاكتئاب، لذلك حاول على قدر ما تقدر تنام في موعد
محدد، وتاخذ قسط كاف من النوم.

كمان.. من المهم إنك تنام في أوضة مفيهاش لا تلفزيون ولا
كمبيوتر؛ لأنه وفقًا للدراسات الحديثة، وجودهم في أوضتك بيقلل
من فرص نومك.

أحدثك وأنا تقريبًا نايم فوق اللاب توب، بعيدًا عن النصيحة
دي، الطريقة اللي تريحك تنام بيها، اعملها؛ المهم تنام.

رسائل

في الفصل دا هتقرأ عن ناس جاها اكتاب، فيهم اللي
اتخلص منه، وعرف يعيش حياته بشكل طبيعي، وفيه اللي
لسه مش عارف، لم أتدخل في صياغة الرسائل؛ كتبها
زي ما جاتني.. وتم إخفاء أسماء أبطال القصص حفاظاً
على خصوصيتهم.

التهاب

من أهم أسباب التهاب العين هو العدوى الفيروسية والبكتيرية
والتي تنتج عن الإصابة بالتهاب في العينين أو في الأغشية المخاطية
التي تغطي العينين. كما يمكن أن يحدث التهاب العين نتيجة الإصابة
بالحساسية تجاه بعض المواد أو نتيجة الإصابة بالتهاب في العينين
بسبب الإصابة بالتهاب في العينين.

(I)

من سنتين كنت في ٣ ثانوي، فكنت كلّ يوم ثلاث متعود
اروح ألعب كورة مع أصحابي بعد مجهود شاق من المذاكرة، فيه
مرّة صاحبي في اللّعب دخل فيّا جابلي رباط صليبي، طبعًا وقت
صعب جدّا، وكان فاضل على امتحاناتي شهرين، رُحت كشفت
وبتاع، الدكتور قال لي رباط صليبي، ولازم عمليّة. بكام يا دكتور؟
ناس قالت بـ ٢٠ ألف، وناس قالت بـ ٥٠ ألف، وفي الحالتين
مفيش القدر المادي اللي يساعد، طبعًا اتلهيت عن المذاكرة،
وكان في تحضيراتي أخش الكلية الحربية، وراحت الحربية وكنت
بمشي بعكاز، وحققيقي بجدّ يئست، خلّصت الثانوية العامّة
ونجحت بتقدير ٧٥٪. قلت الحمد لله، قلت بقي أفتح الحاجّ في
الموضوع إنّي لازم اروح اعمل العمليّة. قال لي يا بني أنت زيّ
الحصان، أنا شايفك ماشي عليها كويس أهو. عارف انت الناس
الكبيرة دي.. المهمّ مسكتش.

نزلت اشتغلت، وعملت قرشين، لقيت مستشفيات كثير، كلّ
يقول أسعار كبيرة، رُحت البيت.. أخويا كان خاطب وقتها، وكان

في أزمة في الفلوس معاه، لقيت أمي بتقولّه هبيعلك الغوايش، وانا قدامي الموضوع بصرخة وحرقة قلب، طب ما انا أولى! بس متكلمتش. دخلت الكلية وبتاع، قلت اسأل في التامين لقيتهم قالولي ممكن تعملها تبّع الكلية ببلاش. قلت خير، رُحت سألت قال لي قائمة انتظار، قلت تمام. عدى ٤ شهور محدش سأل فيّا. رُحت تاني الدكتور قال لي اسمك مش موجود. قلت له ازاي؟! قال لي معرفش بس هات اسمك.

خلّصت ومشيت، ولّعت سيجارة من كتر همي، وكان أول مرّة أشرب فيها، ودخلت السّكة بعدها، وفي مرّة راجع من الشغل كنت ببقى ماشي رجلي بحسّ فيها بكهربا، اللي هو ارحمني، ومش قادر، وفي لحظة ضَعْف دَعيت ربّنا قلت له يا ربّ أنا مش قادر فعلاً، خلاص، بعدها بيومين الدكتور اتّصل بيّا، ورُحت عملت العملية، نصيحتي من أخوكم الصّغير.. متيأسش لو حصلت على حياتك. مصيبة.. صدّقني؛ ده اختبار من ربّنا، وبيعلّم الصبر، أنا فعلاً اتعلّمت المسؤولية من موضوع زيّ ده، ومن وقتها وربّنا بيعت لي كلّ الخير، الحمد لله.

حاجة كمان نسيتها.. الصّحاب رزق، لما الدكتور اتّصل بيّا، ورُحت له، ٢ صحابي كانو معايا في بنها، في المستشفى، طلبوا تحاليل

وأشعّات بـ ١٥٠٠ جنيه، كان معايا ١٠٠٠ بسّ، وكملت من
صحابي بعد ما جيبونا فضيت، وقفت معايا..

على ٢٥ جنيه تذكرة حجز، ومحدّش فينا كلنا معاه غير بتاع ١٥
جنيه، وطلبت معانا بجوع، قعدنا في الشارع قدام كبابجي، والرّيح
دوّختنا، لحدّ ما اخويا جه، بعدها بساعة جاب لي فلوس.

(٢)

٣ شهور اكتئاب مش بخرُج من الأوضة (الغرفة)، جالي بسبب ظروف سياسيّة عصبية، وكملت بمرض بتتي ٩ سنوات بالسّكر، وابتعاد أغلب الناس والأصحاب عني، وانا راجل مهندس، وكنت بشتغل في شركة كبيرة، ومرتبتي يعدّي الـ ٢٥ ألف، وكلّ ده راح، وناس كثير من أصحابي اللي كانوا قريين بَعُدوا عني، وقعدت ادور على شغل ومش لاقى للأسف، فدخلت في اكتئاب شديد، ومخرجتش منه غير بفضل الله، ودعوة أمي، وفرحة بتتي لما قالت لي أنا محتاجك يا بابا.

وكان معايا في وقتها تأشيرة كندا وأستراليا وأمريكا، وأنا أصلاً درست في أمريكا سنتين؛ من ٢٠٠٨ لـ ٢٠١٠، وأدّعي إنّي مهندس شاطر، جات إنّي حدّ بلغ عني، ودخلت المعتقل ٧ شهور بلا ذنب، وخرجت وحصل اللي فوق ده، بعدها بدعاء أمي لقيت شغل بمرتب ضعيف، وواحدة واحدة ربنا كرمني، وسببت مصر خالص.

الاكتئاب صاحب يبسحبك، ويضعفك، وكلّ ما تفكّر تطلع منه وتقوم، تاني يوم تلاقي نفسك بتتسحب له تاني من غير ما تحسّ، الاكتئاب يعني مفيش حاجة بتسعدك، مفيش حاجة بتخليك تعرف تضحك من قلبك، مفيش حاجة، درجته بتختلف مممكن يكون بسيط ومرحلة وتعدّي، وممكن يكون شديد، وشدّته بتوصل أحياناً للانتحار، من رأيي.. ومن تجربتي أكثر حاجتين بيخلوا الإنسان يقدر يقاوم الشعور ده.

أولاً إنّ الإنسان يحاول يشعر نفسه بقوّته، أنا قويّة قويّة قويّة، وفيه كمان العمل الخيري وسيلة فعّالة جدّاً في مقاومة الضعف والإحساس بالقوّة علشان مش أي حدّ عنده القدرة إنه ياخذ من وقته ويديّه لغيره علشان يفيدهم بدون مقابل.

ثانياً بقى الضحك زي الأنثيايوتك (المضاد الحيوي) كده تتفرّج علي فيديوهات قصيرة تضحك أول ماتصحى.. قبل ماتنام.. والفديوهات كثير، من الأساسيات في محاربة الاكتئاب البعد عن الحاجات المضرّة.

المكتئب زيّ المدمن بيدورّ دايماً على الحاجات الحزينة اللي
تغذي إحساسه بالاكئاب؛ أغاني ومشاهد لازم نبعد عن كلّ ده،
نبعد عن القصص الحزينة، الأغاني الحزينة، المطربين اللي صوتهم
شجن حزين، حتّى لو أغنية حبّ زيّ تامر عاشور كده (تامر
عاشور بلاش يا جماعة).

كلّ ده ممنوع.. ممنوع.. ممنوع، منقراش غير قصص الأمل
والحاجات المفرحة، نبعد عن قصص الحاجات اللي محرومين منها،
واللي هيّ سبب اكتئابنا، لو مكتئبة من تأخير الزواج نبعد عن
قصص الناس اللي اتجوزت، وعاشت في تبات ونبات؛ علشان ده
هيصحّي الجرح، لو مكتئبة من عدم الخلفة يبقى نبعد عن فيديوهات
الأطفال الصغيرة الكيوت لحدّ ما نخرج من المرحلة دي، مع كلّ
دول بقى مننشاش نقول يا ربّ.. يا ربّ أول ما نصحى، ويا ربّ
كلّ لحظة، وكلّ ثانية، وهتفاجئوا.

(٤)

صاحب عُمرى مات، نام جنبي وانا قُمت وهوّ لأ، بعدها
مطلعتش يوم لقدام..

كان دايمًا يقول لي.. إنت سندي وعكازي، ميعرفش إنه قطمني
(قَسَمَني وقصم ظهري). ومقامتليش قومة من ساعتها. إزاي
اتعافيت.. لما بقيت بروح له شبه يوميًا بعد سنين من وفاته، وادخل
أوضته في بيتهم واعيش معاه، وارنّ على نفسي من تليفون تاني،
واقعدُ أكلمه كأنه هو.

(٥)

جالي اكتئاب، بسّ مش بنسبة مُخيفة، كنت والدة بنتي الصغيرة،
كان عمرها أسبوع.. وماما حصلها حادث شنيع.. عربية شالتها
من على الطريق السريع، رفعتها عشرة متر لفوق، وقعت جاهها
ارتجاج وكسر ونزيف داخلي، وتغيير في مفصل الذراع الشمال، اللي
هي أصلاً كانت رايحة تكشف عليه بسبب عمليتين دعامة للقلب
كانت عملاهم قبل ولادتي بشهر تقريباً.

فضلوا مخبيين عليا يومها خوفاً من اكتئاب النفاس للوالدة،
بسّ انا عرفت، وفعلاً دخلت في الاكتئاب اللي كانوا خايفين
عليا منه، بسّ شفت ماما قوية، في عزّ جبروت ألمها مكانتش
بتشكي، ولا بتبكي قدامنا، مكانتش بتحب حدّ يسندها يقومها،
أو يساعدها حتى في دخول الحمام، حتى البرشام المخدر رفضته،
رفضت الكرسي المتحرك.

أمي كانت بتخلينا نطلع برّه الأوضة عشان تقووووول
يا رب، وفي عزّ تعبها ده رفضت إنها تسجن الشاب

اللي خبطها بالعربيّة، قالت لوكيل النيابة أنا مسّمحاه لوجه الله،
وتنازلت عن المحضر، والشّاب عرض علينا تمّن العملية، بابا وماما
واخواتي رفضوا، ساعتها بس عرفت إنّ كلّ آلام الدنيا تهون قصاد
كل الوجع اللي في أمي.

بدأت أتعلم منها يعني إيه صبر.. يعني إيه تحمل.. وقوة. ومن
ساعتها، مبوريش دمعتي لحد، وبطبطب على نفسي، وعلى اللي
حواليا.. لكن مبخليش حدّ يطبطب عليّا، ولا يقولي معلش.

مُستحيل تخرج من الاكتئاب لوحدك، لازم حدّ يقف جنبك
ويطمّنك إنّ انتّ عندك لسه كثير.. وإنّ اللي جايّ أفضل..
ويساعدك تقوم.. ويفضل مراقبك لحدّ ما يتأكد إنّك بقيت كويس،
الحدّ دا تفضل طول عمرك مدين له بالولاء والجميل اللي مستحيل
تنساه.

٣٠ قصة

١- في أول حفل توقيع لجوان رولينج، مؤلفة «هاري بوتر»، حضر لها أربعة أشخاص فقط، كان من بينهم زوجها، دلوقت.. تم بيع ١١ مليون نسخة من الجزء السابع من كتابها في أول أيام صدوره، وحققت سلسلة هاري بوتر- أفلامًا وكتبًا- إجمالي مبيعات تصل إلى ٢٥ مليار دولار.

٢- لوحة واحدة من رسوماته هي التي بيعت خلال حياته كلها، ولم تباع لإعجاب اللي اشتراها بيها، ولكنه باعها لأخت صديق له مقابل ما يعادل ٥٠ دولار اليوم، هذا لم يمنعه من رسم ٨٠٠ لوحة فنية يتهافت العالم على اقتنائها اليوم.. إنه العبقرى فان جوخ.

٣- أبوه مُدمن، والواد اتعلم الإدمان من أبوه.. اتمسك بمخدرات واتحبس أربع شهور.. طلع من السجن مبطلش إدمان، وبعدها بستين اتسجن بحياسة المخدرات. دا روبرت داوونى جونيور، ثروته ٢٥٠ مليون دولار، وواحد من أغلى الأجور في أمريكا كلها.. صاحب شخصية أيرون مان.

٤- طالب فاشل في الثانوية العامة، مجموعُه ٥٠ ٪ بعد سقوط أربع سنين، قدّم في معهد أمناء الشرطة وأترفض. بعدها دخل معهد، وحلّم إنّه يسافر دولة من دول الخليج، وأهو يبقى زيّ أبوه وخلاص.. دا أحمد حلمي الممثل المشهور.

٥- طفلة يتيمة فتحت عينها في دور أيتام في فرنسا، يا دوب بدأت تفهم الدنيا. الدار قالت لها شوفي حالك بقى.. وسعي مكان لغيرك. راحت اشتغلت مطربة في ملهى ليلي، وحياة بؤس البؤس. دي كوكو شانيل اللي قلبت الأزياء والموضة في العالم.

٦- أب مصري من دمياط، عرف إن بنته اللي عندها ٣ سنين عندها السرطان، وفي مراحل متأخرة، وكلّ الدكاترة قالوله إنها هتموت مفيش أي أمل في شفائها، وبالكتير هتعيش أيام، إنت عارف الأصعب من الموت أنتظاره، واللي أصعب من الموت معرفتك بيه، الراجل سأل بنته نفسك في إيه؟ قالت له نفسي ابقى عروسة، الراجل جاب لها فستان فرح، وعملها فرح صغير ومسك بوكية ورد واتقدّم لها. وبعد أيام من الفرح دا البنت ماتت. كلّمني بقى عن أيّ وجع انت بتحسّ بيه، وقارنه بوجع الراجل دا، وقول الحمد لله.

٧- بنت جميلة اسمها مكائيل جان، من دولة اسمها هاييتي. جاتها منحة علشان تدرس الصحافة في كندا سنة ١٩٦٨، تعبت..

اتبهدلت.. شافت أيام صعبة؛ إنتَ مُمكن تتخيل إنها بعد كدا هتبقى
كاتبة كبيرة! لكن في سنة ٢٠٠٥، مكائيل بقت حاكمة كندا كلها.

٨- تعرف ليوناردوا دي كابريو؟! ليوناردوا بدأ التمثيل سنة
٨٤، لكنْ تقدر تقول إنْ بدايته الحقيقية سنة ١٩٩٧ لما عمل دور
جاك داوسون في فيلم «تاي تانيك»، وفضل من سنة ١٩٩٧ يروح
حفل الأوسكار ويلبس بدلته الشيك، ويروح يحضر الأوسكار،
ومياخذش الجائزة، وعمل أفلام عظيمة زي «Catch Me If
You CAN»، وفيلم Inception .. وسنة ٢٠١٦ .. يعني بعد
حوالي عشرين سنة خد الأوسكار عن فيلم «The Revenant»،
تخيل عشرين سنة بعشرين حفلة بعشرين إخفاق، وبعدها نجاح،
وكانت حفلة حصوله على الأوسكار رائعة.

٩- في سنة ١٨١٦، عائلته اتطردتْ من منزلها، وراح يشتغل
عشان يوفّر منزل لأهله، وكان عمره وقتها ٢٣ سنة، بعدها بسنتين
ماتت أمّه، في سنة ١٨٣١ فشل في عمله، بعدها بسنة قرّر يخش
الانتخابات، خسر، طردوه بعدها من الشغل، قرّر إنّه يسببه من
الغلب دا.. وياخد قرض، ويعمل شغل لحسابه، فشل وأعلن
إفلاسه. قرّر يكمل نصّ دينه ويتجوّز.. خطب واحدة ماتت بعد
الخطوبة، دخل في حالة من الاكتئاب بعدها.

قدّم في وظيفة متحدث رسمي للمجلس التشريعي رفضوه،
رشح نفسه في الكونجرس وفشل، اترشح ثاني بسّ المرّة دي نجح،
قضى دورّه في الكونجرس، وقرّر يترشح ثاني فخر، جرّب شغل
ثاني وقدم في شغل جديد اترفض، اترشح لمجلس الشيوخ وفشل،
اترشح مرّة تالته وبرضه خسر، لحدّ سنة ١٨٦٠ قرّر إنه يترشح
لانتخابات أمريكا في خطوة لو حكى لأيّ حدّ عليها هيقول عليه
مجنون. وفي سنة ١٨٦٠ انتخبوه رئيس أمريكا؛ إبراهيم لينكولن..
واحد من أهم رؤساء أمريكا، هو أيّ نعم اغتالوه، بسّ الشاهد في
القصة عدم التوقف عن المحاولة.

١٠- كان عنده نقص في هرمون النمو، ولما بلغ ١١ عامًا، وعائلته
متقدّرش تتحمّل علاجه، نادي أسباني شافّه، وقال المسئولون إنّ دي
موهبة ينفع نستثمر فيها، وعشان كدا النادي دا معاه واحد من أعظم
من لمسوا كرة القدم في التاريخ، كام مدرّب قال لميسي إنت قصير،
ومش هتنفع تبقى لاعب كرة، ودلوقت ميسي اللي عنده نقص في
هرمون النمو؛ هو اللاعب الأشهر في العالم.

١١- حسين الشحات لاعب الأهلي، كان في لقاء مع مهيب
عبد الهادي في برنامج «اللعب»، في اللقاء حسين اتكلم عن
والدته، وقال لها حرفيًا: «شكرًا على اللي انتِ عملتيه معايا، ومش

عارف أقولك إيه! ولو قعدت خدام طول عمري تحت رجلك،
واتمنى إنك تفضلي راضية عني وتدعي لي.

وهو بيحكى عنها بكى بحرقه، وقال لها: «مش هنسى اللي
عملته عشان تجيبي الجزمة أم ٧٨ جنيه بتاعة الكورة من التوحيد
والنور، أفكر أنك اشتغلت وتعبت كثير عشان تجيبي لي الحاجات
اللي بحبها، بشكرك جدًا، وبشكرك إنك استحملتيني». حسين
الشحات انتقل للأهلي بأكثر من ١٥٠ مليون جنيه!

١٢- في يوم، رجع طفل من مدرسته بعد ثلاثة شهور من
دخوله للمدرسة، ومدّ إيدته بورقة لأمّه، وقال لها المدرّس ادّاني
الورقة دي، وقال لي أديها لك، قعدت الأمّ تقرأ الورقة وتبكي، كان
الورقة مكتوب فيها «ابنك فاشل يا سيدتي، يؤسفنا أننا لا نستطيع
تقبّله في المدرسة أكثر من ذلك. لا أمل في تعليمه».

سأل الولد أمّه عن سبب بكائها، فقالت له إنّ المدرّسين بيقلوا
له إنك أذكي من اللازم، مش محتاج تروح المدرسة، وممكن تتعلم
في المنزل، وفضلت هي تعلمه في المنزل حتّى أصبح توماس إديسون
الرجل الذي أنار البشرية جمعاء. واللي ليه الفضل في إنارة البشرية،
ليس لإديسون بمفرده، وإنما لأمه التي ظلت إلى جواره ليتحوّل من
طفل فاشل مهدد بأن يصبح على أحسن تقدير ميكانيكي سيارات؛
إلى رجل سجّلت باسمه عشرات الاختراعات.

لما سألوا إديسون عن سبب اختراعه للمصباح الكهربى؛ قال إن السبب هى والدته لأنها كانت فى حاجة إلى إجراء عملية جراحية بسبب مرضها الشديد، إلا أن الطيب لم يتمكن من إجراء العملية بسبب الظلام، واضطرّ للانتظار حتى الصباح.

١٣ - ظلّ لثلاث سنوات غير قادر على النطق نهائيًا، فى حين أن الأطفال فى الطبيعى، بتبدأ فى النطق بعد سنة، أهله ظنوا إنه اتولد أخرس، بسّ الدكاترة قالوا إنه سليم. وفى السنة الثالثة بدأ نطق أول كلام ليه، وكان بيعانى تلعثم واضح فى الكلام، لدرجة إن أمه فكرت إنه بيتكلم لغة تانى غير الإنجليزى، وفضل حتى التاسعة من عمره بيعانى من صعوبات فى النطق، أمه صبرت عليه، وصلبت طوله، وعدّلت لسانه، ليصبح فيما بعد ألبيرت أينشتاين.

١٤ - من طفل مهدّد بالقتل، مطارّد، خايف جعان، مش لاقى أيّ أكل؛ لأنه يبقى سيدنا موسى، نبي الله وكريمه.

١٥ - أنت أفكارك عبيطة، الجملة دي اتقالت لناس كثير، منهم واحد كان عايز يؤسس قناة بتذيع أخبار ٢٤ ساعة، واتقاله هى الناس أصلًا بتطبيق الأخبار لما هتشوف قناة مفيهاش غير أخبار،

دا يا سيدي (تيد تيرنر) صاحب قناة CNN أكبر شبكة إخبارية في العالم، والمصدر الرئيسي للأخبار في أنحاء المعمورة.

١٦- صدقني الموضوع مستحيل، أنت عارف الموضوع محكوم عليه بالفشل، دا كان ردّ الممول على واحد كان عايز يعمل موبايل بيشتغل بززار واحد بس، ويعتمد على اللّمس، دا (ستيف جوبز) صاحب شركة آبل، مخترع الآيفون، اللي الناس بتقف طوابير علشان تشتري تليفونه.

١٧- اتولد من غير أطراف نهائي لا إيدين ولا رجلين، الأسترالي نيكولاس فوجيسيك، عاش وحبّ وأنجب، أنا عارف إنه لو كان في مصر كان زمانه بيتسوّل في المترو أو واحد في «الحسين» والناس مسمّياه البركة، نيكولاس إنجازاه مش إنه اتجوّز، دا حصل على ثلاث شهادات في مجال الاقتصاد وهو مدير أكبر مؤسسة في العالم لذوي الاحتياجات الخاصّة، ومسؤول اقتصادي عن مؤسّستين اقتصاديتين كبيرتين، وواحد من أنشط الناس دعماً لذوي الاحتياجات الخاصّة.

١٨- راجل مسلم من غانا، ظروفه ضنك الضنك، حرفياً يوم بيتعشى وعشرة لأ، عارف انت الطيارات الصّغيرة اللي بيحطّوا

عليها كاميرا اسمها «Drone»، واحدة منهم تابعة لشبكة الأخبار التركية وقعت فوق بيت الراجل الغاني، فريق القناة الاخبارية دي قعد يدور عليها لحدّ ما لاقوها فوق بيت الراجل الغاني، ادهالمهم وقالهم حلوة الطيارة دي، مفيش واحدة أكبر منها توديني أحج؟ ضحكوا عليه ومشى، واحد من الصحفيين صورّه وكتب القصة بتاعته، وصل الخبر للحكومة التركية واتواصلت مع الصحفي اللي كتب القصة، وبعثوا للراجل الغاني واتكفلوا بحجّ الراجل دا، معتقدش إنه لما نام بالليل خطط إنه يحج.

١٩ - شاب باكستاني اسمه أرشد خان، بيع شاي، أرشد كان واقف في (بازار أتوار) بيقدم الشاي للزبائن، شافته المصوّرة «جيا علي» اللي كانت بتشتغل على فوتو سيشن في نفس المكان، المصورة صورته كام صورة وهو بيصبّ الشاي، ونشرت الصور على موقع إنستجرام، بسّ يا سيدي، وأرشد بقى أشهر من ممثلين هوليوود، شهرة عالمية، الصور عجبت ملايين الناس، وبقى الواجهة الاعلانية لأكبر شركة ملابس في باكستان، بدوسة فلاش، ربنا نقل حياته من بيع شاي لواحد مشهور الناس بتتصوّر معاه.

٢٠ - اتّوَلد في أسرة فقيرة جدًّا، أبوه سافر مع بنت عمّه عشان يحلّ مشكلة ليها مع طليقها، وغاب هناك، أمّه راحت تشوف أبوه لقت أبوه اتجوّز بنت عمّه، اتوَلد فقير مش متعلّم، اشتغل ماسح أحذية، عامل في محطة وقود، ميكانيكي، وأثناء شغله في أحد المصانع يتقطع صُباعه، قصّة دراماتيكية جدًّا، الرّاجل دا لولا دا سيلفا، اللي حكم البرازيل، واستلمها وهيّ مديونة لطوب الأَرْض، وفي ٨ سنين سلّمها خامس اقتصاد على مستوى العالم، تفتكر لو ظروفه كانت أحسن من كدا كان تُمكن بقى رئيس للبرازيل، تفتكر لو محتكّش بالعمل، كان يُمكن اهتّم بالعمل النقابي، وبقى زعيم نقابي وبعدها حزبي، وبعدها رئيس للبرازيل كلّها في حين كان كلّ أمله، شقّة في العاصمة يعيش فيها هوّ وأمّه.

٢١ - ماركيز، عارف الاسم دا؟ تقريبًا دا واحد من أشهر الكُتاب في العالم، ماركيز فضل شهور يكتب في روايته «مائة عام من العزلة»، وبعد ما خلّص كتابة الرّواية، راح هوّ ومراته «مارثيدس» لمكتب البريد علشان يبعثوها لدار النّشر، الفلوس اللي معاهم متكفّيش يبعثوا الرّواية بالكامل، ومكانش معاهم حاجة غير الآلة الكاتبة بتاعته وخاتم الجواز اللي جابهوها، هوّ صمّم

يبيع الآلة، وهي صمّمت ترهن الخاتم لأنها عارفة يعني إيه الآلة بالنسبale، وهو عارف يعني إيه الخاتم بالنسبaleها.

صحي ماركيز من النوم لقي مرأته باعت الخاتم، وبعتت الرواية، الرواية اتنشرت، وبقت واحدة من أشهر الروايات في العالم، واترجمت لـ ٢١ لغة، واتباع منها ملايين النسخ، وفي عام ١٩٨١ نال جائزه نوبل في الأدب عن مجمل أعماله.

٢٢- سُفّت فيلم «الأب الروحي»، أكيد شفت آل باتشينو، المنتج لما جابوله ألباتشينو عشان يعمل الدور، قاهم دا قصير.. إزاي هيعمل الدور؟ آل باتشينو قام مثل الدور قدام المنتج، وخطّ المسدس بتاعه فوق دماغه، المنتج وافق، ومضى معاه عقد بـ ٣٥ ألف دولار، والمنتج قال مكنتش مُقتنع بيه نهائيًا، في الجزء الثاني من الفيلم، كان عقد آل باتشينو ٥ مليون دولار.

٢٣- مارك توين الكاتب الساخر العبقرى، راح ينشر أوّل عمل له، الناشر عامله وحش جدّا، وتقريبًا طرده بالطريقة، مارك توين، زهق وخدّ كتابه ونشره في حتّة تانية، الكتاب كسر الدنيا حرفيًا، الناشر كان بيكلّم مارك توين، ويقولّه معاك أغبى ناشر على وجه الأرض، الناشر اللي طرد مارك توين، أنا الأغبى في القرن العشرين.

٢٤ - «أنتوني برجيز» راجل مدرّس، وكانت حياته تمام، كان بيعحب الكتابة قوي، بس هموم الوظيفة خلّته يبطل تفكير في الكتابة أصلاً، في يوم أخونا برجيز دا تعب، راح للدكتور قاله «عندك ورم خبيث، ومش هتعيش أكثر من سنة» جُملة قاسية، بتبقى عايش في رُعب، ومستني الموت في كل ثانية.

برجيز قال لنفسه «أنا مش فاضلي غير سنة، هعمل حاجة تخلّد اسمي بقي، طيب وانت إيه اللي يخلّد اسمك وانت تعرف تعمل حاجة غير الكتابة؟ قرّر إنه يكتب طول السنة دي، بقي يصحى من النوم عشان يكتب وينام وهو بيكتب، عاش سنة كاملة يعمل الحاجة اللي بيعحبها، برجيز مكانش هيعمل كدا من غير «لين» مراته اللي كانت عارفة إنه بيعحب الكتابة، وقالت آهو يعمل الحاجة اللي بيعحبها، كتب في السنة دي خمس قصص ونصف، وعدت السنة دي ومماتش، راح للدكتور قاله هي حاجة من الاتنين؛ إمّا انا شخصتك غلط أو انت قهرت المرض ومبقالوش أثر.

من يومها وعمك برجيز خدّ عهد على نفسه إنه ميكتبش أقلّ من ألف كلمة يوميًا، وأكثر من نصّ أعماله اتحلّ لأفلام، وألّف أكثر ٧٠ قصّة ورواية، وكانت وفاته نتيجة لإصابته بسرطان الرئة،

وكان برجيز كان محتاج تشخيص غلط علشان يعمل اللي هيخلد اسمه، واللي بيحبّه.

٢٥- بريان أكتون مهندس برمجيات كان شغال في ياهو، راح قدّم ورقّه في فيس بوك ورفضوه، راح اشتغل مع صديقه جان كوم، وعملوا تطبيق «واتساب»، المهمّ فيس بوك اشترت واتساب منهم ب ١٩ مليار دولار.

٢٦- في سنة ١٩٧٥ كتب نصّ رواية اسمها «كاري»، واللي بعد ما انتهى من كتابتها رماها في سلة الزبالة، ليه كدا؟ قالها لم أشعر بها. وهنا أتى دور زوجته، جابت الرواية من القمامة قريرتها حطت خطوط حوالين علامات الاستفهام اللي فيها، وقالت لي كمّلها علشان خاطري، الرواية كسّرت الدنيا مبيعات بالملايين، وشهرة، وحفلات، وسهرات، الرواية اتحوّلت لفيلم كسّر الدنيا برضه، والراجل دا اتصنّف كواحد من أفضل كتّاب الرعب في التاريخ، ستيفن كينج اللي قال في لقاء تلفزيوني إن رصيده بيزيد أسبوعياً ١٠ مليون دولار من عوائد أعماله وكتبه وأفلامه، واللي بعته أعمل معاه حوار وقال لي ابعثلي الأسئلة، وبقاله ٣ سنين بيقرأ الأسئلة.

٢٧- مش هينفع تلعب معانا في الزمالك، هتحتاج مجهود كبير، وبقي محمد صلاح.

٢٨- مناقشتي للماستر كانت يوم السبت في أول شهر مارس، يوم التلات قبل المناقشة، المشرف على الرسالة عمل حادث سيارة، واتحجز في المستشفى تلات أسابيع، وحالته كانت حرجة، الحمد لله قام بالسلامة، وناقشت السبت ٢٤ مارس، صديقة فيسبوكية.

٢٩ - في لقاء لي مع الإعلامي «طارق حبيب»، حكى الشيخ الشعراوي عن الكذبة التي غيرت حياته، الشيخ مكانش بيحب الأزهر، وبكل الطرق حاول ميكملش بس مفيش، لحد ما وصل سنة تالته كلية، وفي يوم عدى من قدام مكتبة واحد اسمه محمد زكي، وكان فيها أمهات الكتب، دخل المكتبة لقي الكتب أصناف وأشكال، سأل محمد زكي عن شوية كتب قالوا دي مراجع يا بني أساتذتك ميفهموهاش، خلّيك في اللي قدك، الفكرة جات للشيخ الشعراوي، بعت لأبوه يجيله الكتب دي، فلما يلاقي الموضوع صعب ومكلف، يصرف نظر عن الموضوع، واتفق مع صاحب المكتبة إنه هيجيب أبوه وينزله الكتب دي كلها.

فعلاً بعث لأبوه إنه عاوز الكتب، فالراجل مكذبش
خبر وسافر له، المهمّ راح الشيخ الشعراوي خد أبوه ودخلوا
المكتبة عبّوا كراتين من الكتب وأمّهات الكتب ومجلّدات
ومراجع، وكلّ ما يسأله يا بني كلّ الكتب دي مقرّرة عليك،
يقوله أوّمال إيه، مش وصلت سنة تالته! والراجل دفع كلّ
اللي معاه، المهمّ والد الشيخ الشعراوي لقي الكتب غالية
ونضيفة، قال له لأ أنا هروح أجيب جلاّد والزقّهولك على
الكتب عشان تعيش معاك طول السنة، والراجل قعد يلزق
لحدّ الفجر.. الشيخ الشعراوي في اللّحظة دي اتأثر إنّ أبوه
متبهدل بسبب كدبة منه.

المهمّ الراجل صلّى الفجر، وقال لابنه أنا همشي بقى، فالشيخ
الشعراوي راح معاه المحطّة عشان يوصله، في المحطّة قال لابنه:

- على فكرة الكتب كلّها اللي جبتها لك مش بتاعة سنة
تالته، وكتبك كلّها بـ ٣٨ قرش، بسّ «أيوه الرقم صحيح»
عشان مش حلّو تفكّر إنّ أبوك راجل مغفل.. بسّ يلا، ربّنا
ينفعك بالعلم اللي فيها.

وكانت أبواب السّما مفتوحة، فرّبنا قبل دعوته، ونفع

الشيخ الشعراوي بالعلم الّلي في الكتب، ونفعنا بالشيخ
الشعراوي، من طالب مش حابب التّعليم، لو احد اتعلّم ولسّه
هيتعلّم على إيده آلاف.

٣٠ - كان بيكي كلّ يوم علشان ميروحش حصّة العربي،
عشان المدرّس بيشتّمه، ويقوله طلّع الفعل المضارع من القطعة،
ودلوقت أنت بتقرأ في كتابه السّادس، وأصغر صحفي نشر مقال
(١٩ سنة)، والأوّل على الثّانوية العامة، وأحسن واحد يعمل بيض
باللانشون.

في النهاية

طالما انت وصلت للصفحة دي، بدايةً أنا مش عارف انت وصلت لها ازاي! بس انا عارف أنا وصلت لها ازاي.. عارف يعني إيه مريض اكتئاب، وعارف يعني إيه تحسّ إن الدنيا سودا، ومبتشحرّكش، وممّلة، وكلّ حاجة بتعملها مبتكملش، كلّ خطوة بتخطّيها بترجع بداها عشرة، وعارف يعني إيه حقك يتسرق منك عشان حدّ تاني، وعارف يعني إيه حبيبتك تضيع منك وياخذها حدّ تاني.

وعارف يعني أحلامك اللي حلمتها يحققها حدّ تاني بمجهود أقلّ، أو من غير مجهود عشان مسنود، أو عشان باباه حبّ يريجه على حسابك، عارف قدّ إيه إحساس الموت صعب، وإحساس الفراق صعب، دا مش كلام مقفّى أنا بقوله عشان أرضيك؛ كلّ كلمة هنا أنا عشتها، ومرّيت بيها.

بسّ كمان عارف إنّ عند الله تجتمع الخصوم، وعارف إنّ في ناس وصلوا لّي انت وصلت له ١٠٠ مرّة وربّنا أراد يتغيّر الوضع

من حال لحال، بس هو ربنا منطقه في الأشياء الأخذ بالأسباب، هو له خلاه يهاجر من مكة للمدينة بالطريقة الصعبة دي! ودليل من غير ملته، ومطاردات وموضوع شاف، كان ممكن يقول للشيء كن فيكون، وينقله من مكة للمدينة في لمحة عين! كان عايزه يأخذ بالأسباب، ويسعى، ويأمن إن ربنا هيكّل السعي دا بالخير.

إنت مش محتاج غير حلم تعيش علشانه، وحدّ يشاركك الحلم دا، لو اتظلمت أو اتجرحت، أو اتأخذ حقك؛ حطّ في ودنك جُملة قالها فرانك سيناترا «أفضل انتقام أن تنجح بشدة».

أرباحُ الكاتب عن هذا الكتاب وقفٌ لأعمال الخير،
والمستشفيات، التي تعالج الاكثابَ بالمجان.

Main body of handwritten text, consisting of several lines of cursive script.

عن الكاتب:

بهاء حجازي، كاتب مصري، من مواليد محافظة سوهاج، صحفي،
وروائي وسيناريست، خريج كلية الإعلام جامعة القاهرة.

صدر للكاتب:

كتاب «سنوات المزز الضائعة»، ساخر.

«لم تعتنق ديناً بعد»، رواية.

«أموات يُرزقون»، رواية.

«ما بعد رحيله»، رواية.

«منزل الرجل الأعمى»، رواية.

تمّ بحمد الله، وتوفيقه.

نوفمبر ٢٠١٩ - الساعة السادسة صباحاً، بعد كتابة ٣٦

ساعة متواصلة، وكان الكاتب يعاني اكتئاباً حاداً.

سلام.

Handwritten title in red ink

Handwritten text paragraph 1

Handwritten text line 1

Handwritten text line 2

Handwritten text line 3

Handwritten text line 4

Handwritten text line 5

Handwritten text line 6

Handwritten text line 7

Handwritten text line 8

Handwritten text line 9

فهرس المحتويات

- إهداء 5
- لا تفعلْ مثلي 9
- إهداء خاصّ جدًّا 11
- الحكاية (1) أمّ ندا 13
- نصيحة 1 18
- الحكاية (2) الكرسيين اللي قدام 19
- نصيحة 2 22
- الحكاية (3) الأمبوّلة برّدانة 23
- نصيحة 3 25
- الحكاية (4) سما المصري 26

29 نصيحة 4

30 الحكاية (5) أم محمد

33 نصيحة 5

37 الحكاية (6) نصيحة 6

39 الحكاية (7) علاء.. مستشار عاطفي

42 نصيحة 7

44 الحكاية (8) البفتة

47 نصيحة 8

48 الحكاية (9) أمي والأسعار

51 الحكاية (10) الأحمر يليق بي

54 نصيحة 10

55 الحكاية (11) بطاقة أميرة

58 نصيحة 11

- 59 الحكاية (12) التاجر علي
- 62 نصيحة 12
- 63 الحكاية (13) هوّ البوس اللي في الأفلام دا حقيقي؟!
- 67 نصيحة 13
- 68 الحكاية (14) أيوه عارفك يا أستاذ
- 71 الحكاية (15) كاس فلسطين ولطالما
- 74 نصيحة 15
- 75 الحكاية (16) اعتياد
- 78 نصيحة (16)
- 81 الحكاية (17) الدّايت
- 83 نصيحة (17)
- 84 الحكاية (18) الدّيك حارس المقبرة
- 87 نصيحة (18)

88 الحكاية (19) مصطفى كامل

91 نصيحة (19)

92 الحكاية (20) إشاعات... إشاعات.. نقول لسه

98 نصيحة (20)

99 الحكاية (21) منزل الرجل الأعمى

102 نصيحة (21)

103 الحكاية (22) حمادة

107 نصيحة (22)

108 الحكاية (23) بنطلون فرح أسامة

112 نصيحة (23)

113 الحكاية (24) المسمار

116 نصيحة (24)

118 الحكاية (25) أسيوط

- 122 نصيحة (25)
- 123 الحكاية (26) السينما
- 126 نصيحة (26)
- 128 الحكاية (27) عرض لا يمكن رفضه
- 132 نصيحة (27)
- 133 الحكاية (28) لازم أروح المعرض
- 137 الحكاية (29) بابا، أنا عاوز اتجوز أبله منى
- 140 نصيحة (29)
- 141 الحكاية (30) القلم يا إيمان
- 144 نصيحة (30)
- 145 الحكاية (31) منجد بنت العمدة
- 149 نصيحة (31)
- 151 رسائل

163 30 قصة

179 في النهاية

183 عن الكاتب:

185 فهرس المحتويات





خلاف من الحسين الي فدام

سألت لماذا لا يوجد لدينا كتب نقرأها فنضحك،
دون أن يكون خلفها أي هدف سوى الضحك،
كتب غير عميقة ولا تحتوي علي حلّ للقضايا
الكبرى، لا يوجد بها حلّ للملف النووي
الإيراني، أو الصلح بين الكوريتين، وعودة كريم
بنزبما لهجوم المنتخب الفرنسي، ولا لمصير
الشرق الأوسط الجديد بعد هلاك الخنافس
في نفق العروبة، أو دور الجنّ في نتائج نادي
الزمالك؛ وليه مروان محسن؟!
في هذا الكتاب، سأضمن لك شيئاً وحيداً أن
تضحك، ما عدا ذلك معرفكش.

حفظ الله الوطن، وجريدة الوطن، ورؤوساء حيّ
بولاق الذكرور على مرّ العصور، عشان الحنة
اللي تحت الدائري اللي جابتلي الغضروف
ومش عارفين تصلحوها.

بهاء حجازي